



السيرة النبوية

بشرح المهندس علاء حامد

المحاضرة العاشرة

الدعوة السرية

" فنون الدعوة المحمدية وأسرار التغيير "

الحمد لله وأشهد أن لا إله إلا الله وحده لا شريك له، وأشهد أن محمدًا عبده ورسوله ﷺ، أما بعد:

مرحبا بكم في اللقاء العاشر من مدارس سيرة النبي ﷺ، نسأل الله - سبحانه وتعالى- أن يجمعنا به ﷺ في الفردوس الأعلى، وأن يجعل هذه السلسلة المباركة شفيعة لنا يوم القيامة.

النهاردة عايزين نركز عشان مواضيع كتير، والأحداث هتبتدي تسخن، والفوائد كتير والثمرات، كل ما الواحد يتعمق في هذه السيرة المباركة يجد فيها كل شيء فعلاً، كل ما يتمناه الإنسان، كل الأفكار، كل ما يتعلق بالفكر، بالعقيدة، بالسلوك، بالأدب، كل حاجة موجودة، لكن بس إحنا نركز إزاي ننتفع من هذه السيرة، أنا عايز اعلمك إزاي تعمل كده، عشان هي الدنيا مش هتقف على اللي أنا بقوله بردو، أنت يكون ليك بردو نظر، يكون ليك فوائد، يكون ليك بحث، فلازم تتعلم إزاي تستفيد من السيرة، هي دي أصعب حاجة، وإلا فالكتب موجودة، وكذلك تفاسير القرآن موجودة، بس دايمًا بيبقى التعليم كيف تتدبر القرآن؟ كيف تفهمه؟ كيف تتعامل مع السيرة؟ هو ده الوسيلة اللي أنت لو طلعت بيها يبقى أنت طلعت في حاجات مهمة جدًا هتنطلق بها مع نفسك.

يمكن المرة اللي فاتت تكلمنا في فوائد كتير أوي متعلقة بموقف جبريل من النبي ﷺ، سواء في المرة الأولى أو المرة الثانية، متعلقًا بموقف ورقة بن نوفل من النبي ﷺ، وشفنا ثمرات كتير موقف خديجة من النبي ﷺ، تكلمنا في محاولة الانتحار، تكلمنا في مواضيع كتير، وطرق الوحي إزاي بيحي الوحي للنبي ﷺ.

الشاهد يعني إن أنت من الثمرات يمكن اللي وضحت أوي معنا المرة اللي فاتت لو كملنا المواقف يعني مع بعض، في حاجات أحيانًا مبتشوفهاش إلا

لما تكمل الصورة، بمعنى ضغط جبريل على النبي ﷺ مع قول ورقة بن نوفل: ياليتني أكون فيها جزعاً إذ يخرجك قومك، الموقف مع الكلمة إداك ملمح، وإداك طبيعة طريق، يعني هو الاتنين ممكن تشوف دي لوحدها ودي لوحدها، لكن الاتنين ييجوا ورا بعض فهي كده الدنيا واضحة أوي كفاية، أنا كده إيه يعني لازم تشوف بقى الديكور، كده واضحة جداً، يعني يمكن الضمة دي أنت مستنتجتش ساعتها كان مقصود بها إيه، يمكن كمان يجي ورقة بن نوفل يقول لك الله يكون في عونك يعني طالما مشيت في الطريق ده، الله يكون في عونك، أنت هتشوف و هتشوف، أنا؟ يحصل فيا كده؟ والله هي دي طبيعة الطريق، مفيش حد ما قال اللي أنت قلتة إلا عودي، ياليتني أكن فيها جزعاً إذ يخرجك قومك..

يعني خلاص، وإن يدركني "يومك" انصرك نصراً مؤزراً، يعني جاية جاية، يومك هيجي هيجي، ورقة مزيفش الحقيقة، قالها له صريحة، فكما قال يعني الراهب للغلام إنك ستبتلى، فإذا ابتليت فلا تدل عليا، واضح جداً، هو كل طريق كده، يعني ما في أحد ربّي فعلاً تربية صحيحة اللي كان واضح مع من رباهم هذا، وطبيعة الطريق إن فيه ابتلاء، يعني مفيش مفاجآت، البعض مش مستعد نفسياً للموضوع ده، يقول لك والله دي مشكلتك أنت يعني وإلا فكل الأحاديث وكل الآيات وكل حاجة بتقول لك هي دي طبيعة الطريق يعني:

{مَا يُقَالُ لَكَ إِلَّا مَا قَدْ قِيلَ لِلرُّسُلِ مِنْ قَبْلِكَ...}

{فَأَصْبِرْ كَمَا صَبَرَ أُولَؤَا الْعَزْمِ مِنَ الرُّسُلِ...}

{وَإِنْ يُكَذِّبُوكَ فَقَدْ كُذِّبَتْ رُسُلٌ مِنْ قَبْلِكَ...}

يعني هو سيناريو وبيتكرر، هو نفسه مفيش جديد، {قُلْ مَا كُنْتُ بِدَعَا مِّنَ الرُّسُلِ...} ما هو نفس اللي بيحصل معك بيحصل معهم، وهيفضل يحصل مع كل من سلك هذا الطريق، فاللي بنشوفه من ابتلاءات المسلمين في مشارق الأرض ومغاربها على المستوى الأممي سواء بنشوفه في غزة وفلسطين عموماً، أو سواء بنشوفه في الصين، في أي مكان.

هذه طبيعة الطريق، إخراج الناس من ديارهم، هذه طبيعة الطريق، في أزمنة يكون مسلمين فيهم ضعف لدرجة إن هم ممكن يخرجوا من ديارهم أصلاً، فلا يقول الإنسان إيه ده؟ طب ليه؟ وعملوا إيه؟

طب ده إحنا مسلمين، إذا كان أول كلمة اتقالت لأحسن واحد فينا إن هو هيخرج من دياره، طبعاً نفس الكلام ده يتقال على المستوى الشخصي، يعني لو اتقال على المستوى الأموي يبقى يتقال على المستوى الشخصي من باب أولى، إذا كان أمة تبنتلى، يبقى أكيد الشخص سيبتلى، فأنت لازم تكون موطن نفسك على كده عشان متبقاش قصة غريبة، اللي هو أنا داخل ألتزم وأسلك الطريق إلى الله وهتخالف قومك..

آه إحنا مش هنكلم في مشركين، لكن طبيعة الطريق بقى إن دائماً في مخالفة بتحصل، في يوم من الأيام أنت إلتزمت، يعني مش هتفرج على أفلام، مش هتفرج على مسلسلات خلاص، أنا واحدة هتلبس خمار.. نقاب، آه أنا مش عايز أحضر أفراح، أنا هربي لحيتي، أنا آه هصلي في المسجد، أنا هطلب علم، أنا بروح دروس، أنا بمشي مع إخوة طيبين، حاجات كتير تبنتدي تخالف فيها قومك، مش هسلم على بنت خالتي تاني، أنا مش هسلم على بنات، أنا مش عايز أحضر أفراح، لا أنا الكلام ده مينفعش معي لاحظوا إنك بدأت تبقى غريب مرة واحدة، خلاص أنت الآن بتخالف قومك، هم مسلمين طبعاً لكن بدأت تخالفهم في حاجات ألفوها واعتادوا عليها، ومنها حاجات بيعتبروها مش حرام كمان، يكاد يكونوا مش شايفين إن هي غلط، وفي فتاوى بتقول لهم كمان صح!

فأنت لما تخالف وأول ما يحصل الموضوع ده أعرف إن أنت هتاخذ نفس الطريق، ستعادى، هيحصل عدااء لك مرة واحدة، مش هقول لك "يخرجك قومك" بس ممكن حاجة معينة ممكن مثلاً تتطرد من البيت، يعني في حالات بتوصل لمراحل كده فعلاً الأب بيطرده ابنه من بيته وببشتكوا، طبعاً المسألة محتاجة سياسة ومحتاجة حكمة، والموضوع طبعاً أهون بكثير من كفر قریش يعني، بس عايز أقول لك دي عينة يعني إذا كان حصل كده مع النبي

ﷺ واتطرد من مكة كلها وفي الصحراء، فأنا عايز أقول لك لما يحصل معك حاجات زي كده اصبر وتحمل، متقعدش تندب حظك وتلوم طريق الهداية، وتقول أنتم ضحكتموا علينا، مضحكناش عليك أنت اللي مش مستوعب، يعني أنت اللي مش فاهم سنن، أنت اللي حد خدعك وقال لك الطريق مفروش بالورود، لكن من رحمة ربنا إنه بيبتلي المرء على على قدر دينه، فعشان إحنا غلبة الإبتلاءات بتيجي في الحنين يعني دائمًا، ماشي اتشتمت كده بنتبهدل في البيت شوية، ضاغطين عليا وابويا مهددني، ابويا هيطلق أمني.. كل ده يعني هنشوفه بعدين، فهي كلها حاجات بسيطة يعني، بس آه على قدر دينك، يعني الحمد لله إن إحنا ربنا بيرحمنا على قد مستوانا.

بس عايز أقول لك يعني لو أنت مستحملش الحاجات دي أنت جاي تعمل إيه؟ يعني أنت جاي الطريق تعمل إيه؟

أنت جاي تاكل عقيقة.. ونشوف لك أخت تتجوزها وبتاع.. وتطلع رحلات كورة مع الأخوة.. ما يعني ده موجود بس ده بنطبطب عليك به عشان تستحمل الثاني، يعني عشان متضربش من كل حنة بس، بس هو الدنيا مش كلها فتة ورحلات كورة، في بعض الناس شايف هو ده الإلتزام من ساعة ما إلتزم وهم قاعدين يأكلوه ويلعبوه، أول ابتلاء حصل لا لا بقول لك هنا متفتتش على كده، فلازم بردو أنا كتر بوي اقول لك والله بص الدنيا ده إحنا اللي في قلبك وبنحبك وبتاع، بس خلي بالك ممكن يحصل ظروف مع أصحابك، يعني توقع كده، استعد نفسيًا، فخلاص هو صريح الورقة قالها له صريحة، وجبريل عمل ضمه عشان يقول له توقع في كذا شدة هتحصل في الحياة، فاستعد يعني، فده بيدينا ملمح مهم جدًا من ملامح الطريق.

خديجة -رضي الله عنها- طبعًا قالت لنا حاجة هنرجع لها كمان شوية هقول لكم أول ما أوصل لها هقولها لكم، وهي ارتباط الداعية بالأخلاق، يعني ربطت خديجة -رضي الله عنها- زي ما قلناها بالتفصيل في ملمح بس أنا عايز اربطها المرة دي بالدعوة بقي، **إن النبي ﷺ كواحد مؤهل إن هو**

يكون أفضل داعية في التاريخ، إن هو ده الداعية، الداعية بيصل الرحم، ويحمل الكل، ويكسب المعدوم، ويعين على نوائب الحق، ويقرى الضيف، ده الداعية..

الداعية مش زي ما حالتني كده، ولا مجرد درس بيلقيه، الداعية هو عبارة عن شخص بيدعو بكل شيء، بالسلوك وبالأخلاق وبالمعاملة، شخصية هي مؤهلة، هو ده الداعية، عشان أقول إن أنا بأسس داعية صح لازم يكون في أصلًا البذرة دي، مجرد حسن المنطق، مش مجرد بيعرف يخطب كويس، مش مجرد بيعرف يحفظ خطب ويقولها، وفي الآخر لا شيء، تيجي تتعامل معاه مش نافع، سلوكه في الحياة وتعامله مع الناس علاقته بالناس ضعيفة جدًا، فلا الداعية أصلًا ده الأساس، أنت عارف لو عندك دي اتكلم بأي طريقة بقى خلاص، الناس بتقبل منك، أي حاجة هتقولها هيستجيبوا لك، وخليني أقف هنا وهرجع لها كمان شوية وهقول لك إمتي.

إحنا بقى المرة اللي فاتت وقفت في حنة قلت لكم هرجع لها تاني صح؟ وهي الوحي، لما وقفنا عند أنواع الوحي اللي بتنزل على النبي ﷺ، سواء جبريل أو عن طريق الله - سبحانه وتعالى - مباشرة أو عن طريق المنامات والرؤى الصادقة والكلام ده، فصلنا فيها ووقفنا هل في وحي ممكن يأتي إلى غير الأنبياء؟ أم لا؟ إيه نوع الوحي ده؟

خليني الأول اديكم ببعض الآيات، قال -تعالى-:

{وَأَوْحَىٰ رَبُّكَ إِلَى النَّحْلِ أَنِ اتَّخِذِي مِنَ الْجِبَالِ بُيُوتًا وَمِنَ الشَّجَرِ وَمِمَّا يَعْرِشُونَ}، {وَأَوْحَيْنَا إِلَىٰ أُمِّ مُوسَىٰ أَنَّ أَرْضِيهِ فَإِذَا خِفَتْ عَلَيْهِ فَالْقِيهِ فِي الْيَمِّ وَلَا تَخَافِي وَلَا تَحْزَنِي إِنَّا رَادُّهُ إِلَيْكَ وَجَاعِلُوهُ مِنَ الْمُرْسَلِينَ}

{إِذْ يُوحَىٰ رَبُّكَ إِلَى الْمَلَائِكَةِ أَنِّي مَعَكُمْ فَثَبَّتُوا الَّذِينَ ءَامَنُوا...} {وَإِنَّ الشَّيَاطِينَ لَيُوحُونَ إِلَىٰ أَوْلِيَائِهِمْ لِيُجَادِلُوكُمْ وَإِنْ أَطَعْتُمُوهُمْ إِنَّكُمْ لَمُشْرِكُونَ}

{وَإِذْ أَوْحَيْتُ إِلَى الْخَوَارِجِ أَنْ ءَامِنُوا بِي وَبِرَسُولِي قَالُوا ءَامَنَّا...}
إذا كلمة الوحي استعملت في حياة الشياطين حتى، دي أنا عايز افهمها دي
لوحديها إيه ده؟ إيه الكلام ده؟

خد بالك بقى لازم لما تيجي تتعامل مع كلمة الوحي في القرآن عمومًا تفهم
إن الوحي له معنى في اللغة وله معنى في الشرع، أحيانًا يستعمل في القرآن
بمعناه اللغوي العادي، وأحيانًا يستعمل بمعناه في الشرع، إذا استعمل مع
الأنبياء بيبقى بمعناه الشرعي، فالوحي معناه الشرعي هو اللي قلناه المرة
اللي فاتت، اللي هو ما يأتي إلى الأنبياء من الله بأي طريقة بقى، وده اسمه
الوحي بمعناه الشرعي، معنى الشرع للوحي أي العلاقة بين الأنبياء وبين
الله بأي وسيلة بتوصل لهم، أي رسالة بتوصل للأنبياء عن طريق الله بأي
شكل من الأشكال، الوحي معناه الشرعي ده للأنبياء بس؛ لأنه له صفة مش
موجودة عند حد ثاني وهي "العصمة التامة".

العصمة التامة يعني إيه؟

يعني لا يوجد احتمال للخطأ، ولا إنه يلتبس معه بحاجة ثانية، ميتلخبش
فيه، ميتلبسش معه، مثلاً فكرة جت في دماغه، مش النبي ﷺ ممكن يفكر
كده مع نفسه، عادي النبي آدم بيفكر، ممكن يبقى له هوى معين مثلاً في
حاجة معينة، ممكن بيفكر تفكير شخصي، مشغول بحاجة، هل ممكن يلتبس
عليه اللي في دماغه ده وحي ولا مش وحي؟

مستحيل، طب النبي ﷺ ممكن يجي له منام مش وحي؟ مستحيل، إذا الأنبياء
يتميز الوحي بالنسبة لهم إن هو غير للخطأ مطلقاً، ولا يلتبس عليهم أبدًا، ما
هو ربنا قال كده {وَمَا يَنْطِقُ عَنِ الْهَوَىٰ}، يعني مينفعش تطلع منه، إحنا
بنعصمه من إن هو يلتبس عليه الوحي بالهوى، {إِنْ هُوَ إِلَّا وَحْيٌ يُوحَىٰ}
يعني لا يمكن ينطق كده، لو نطق دماغك تشتغل عادي بس أنت تنطق تقول
مش هتطلع منك إلا موفق من الله ومسدد، يعني الله عصمه إن هو لما ينطق
دماغك تشتغل زي ما تشتغل مش مشكلة، لكن تيجي تنطق وتقول ربنا
بيقول أو أنا بقول كتشريع مش يحصل إن أنت تقول إلا وأنت معصوم،

ممکن یجی لنا بعدین هنتکلم عن سحر النبی ﷺ لو جت معنا، النبی ﷺ سحر وهذا ثبت فی الصحیح، لكن هذا السحر لم یؤثر علی الوحي، إنما أثر علیہ بدنیا، کان بیأثر علیہ فی أمور دنیویة، لكن التشريع مأثرش علیہ، حتی جہ فی بعض الأوقات إن هو کان یُهیأ له إنه عمل حاجات مع أهله ومعملهاش، حاجات دنیویة الی هو أنا النهاردة کلمتک، أنا النهاردة آه قبّلتک، یلتبس علیہ حاجات عادیة، لكن لما یجی یتکلم بالوحي مستحیل مستحیل یكون السحر، السحر لم یؤثر قط علی أي شیء من کلامه طالع بصفة التشريع، ما هو ﷺ بیتکلم کلام عادی، النهاردة هناکل إیہ؟ هنشرب إیہ؟ ممکن ده کلام یعني.. أما الکلام الی هو فعلاً النبی ﷺ بیأصلّ تشریعات زی ما قال: **(أنتم أعلم بشئون دنیاکم)** ممکن یتکلم فی موضوع عادی مع الناس فی الخرس والکلام ده، لكن لو قال تشریعات یبقی تأکد إن لا یمكن یكون اخطأ ﷺ، حتی السحر لا یمكن یؤثر علی عقله من ناحیة الوحي {وَمَا یَنْطِقُ عَنِ الْهَوَىٰ}، هو یبقی ده معنی الوحي الشرعی.

فی الوحي معناه اللغوي، فی دائماً معنی شرعی ومعنی لغوي.

یعني إیہ الصیام فی اللغة؟

الإمساك {إِنِّي نَذَرْتُ لِلرَّحْمَنِ صَوْمًا فَلَنْ أُكَلِّمَ الْيَوْمَ إِنْسِيًّا} هي صامت هنا یعني مكلتش وشربت؟ لأ، هي سکتت؛ فأی إمساك یسمى صوم، أمسکت عن الکلام یبقی اسمی صُمت، أمسکت عن الطعام یبقی اسمی صُمت، فده معناه اللغوي، لكن معناه الشرع الإمساك عن الطعام والشراب (من.. إلی..).

ففی حاجة اسمها معنی فی اللغة ومعنی فی الشرع، الشرع اعتبر له اعتبار معین، فالوحي له معنی فی اللغة الی هو معناه فی اللغة "الإعلام الخفی"، یعني أي حاجة وصلتها لك بطریقة خفیة اسمها وحي، إیہ الفرق بین الإعلام والوحي؟ أو الإنذار والوحي؟ أو الأذان والوحي؟

الوحي دائماً یكون فی شکل خفاء، فیه خفاء، ده هیفسر لك كل النصوص

اللي هنقولها "وأوحى ربك إلى..."، هنا يفصل واحد إن هو الفطرة، فطرة الكائنات كلها وحي، إن ربنا ألقى فروعهم المعاني دي، ليه الأسد بيطلع مفترس؟ وليه الزرافة بتطلع نباتية؟ وليه سيد قشطة رغم ان هو أسنانه عاملة كده بس بيطلع نباتي؟ وليه مثلاً السمك أو الحيوان البر مائي عارف إن هو بر مائي رغم إنه اتولد على البر؟ ولو اتولد في البحر يعني هو عارف إزاي إن هو بر مائي؟

في حاجات كده أنت مستغرب الأداء بتاع نفس الحيوان، نفس الأداء في كل مرة، ليه العصفورة بتعمل نفس الطريقة بالضبط؟

ده اسمه وحي، اللي هو الوحي اللي هو اسمه فطرة، إن ربنا ألقى في روع كل كائن ما يناسبه {قَالَ رَبُّنَا الَّذِي أَعْطَى كُلَّ شَيْءٍ خَلْقَهُ ثُمَّ هَدَى} هداه إلى ما يناسبه من الأفعال، هو ده اسمه وحي، وده ربنا مأوحاش إلى النحل بس، لا ربنا أوحى إلى كل الكائنات، حتى أوحى إلى الطفل الصغير يلتقم ثدي امه، هو عارفها إزاي وطالع مش شايف أصلاً؟ خلاه يلتقم ثدي أمه، ده وحي، اللي هو الإعلام الخفي، ألقى الله في روعك إن أنت المفروض تعمل كده، يبقى ده أوحى حيوان النحل، ونفس الفكرة في الشياطين:

{وَإِنَّ الشَّيَاطِينَ لَيُوحُونَ إِلَىٰ أَوْلِيَائِهِمْ...}

الوسوسة دي نوع من الإعلام الخفي، بيوسوس لك، ده اسمه وحي، يسمى وحي بس في اللغة مش في الشرع طبعاً، أما بقى لما كان الوحي إلى الحواريين أو الوحي إلى أم موسى.. نفس الفكرة بس ده إلقاء في الروع من الله، يعني ربنا ألقى في روعهم، الأولاني سميناه الفطرة، الثاني سميناه الوسوسة بتاع الشياطين، ده اسمه الإلهام.

الإلهام ده بيحصل للأولياء، لما الولي يبقى حاجة حلوة كده وقلبه أبيض كده وحلو، ويشعر إن في حاجة أُلقيت في نفسه كده بتقع منه موقع لأ دي مش مني، دي مش من فكري، دي من الله وهو يعني حاسس إن لازم أعمل كده، حاسس بيقين فيها فعلاً، يقين قوي جداً، ولا وحاسس بوقوة الحاجة اللي

أُلقيت في نفسه دي، اللي هي درجة أن يغلب على ظنه جدًا إنها من الله، وده اللي حصل لأم موسى، ألقى في روعها هذه الفكرة، "أن أرضعيه" فإذا أرضعيه دي الفطرة، لكن الإلقاء في اليم لا دي فكرة جت في وقت ما: {وَإِذْ أُوحِيَ إِلَى الْخَوَارِجِ أَنْ ءَامِنُوا بِى وَبِرَسُولِى قَالُوا ءَامَنَّا...}

يعني هداهم، دي اسمها الهداية، ما هي دي برودو نوع من أنواع الوحي للأولياء، هداهم الله -سبحانه وتعالى-، إذا كل ده بيتسمى وحي.

طيب سيبنا من كل الأنواع دي، خليني في النوع الأخير اللي أنا عايز أمسكه، اللي هو بيحصل للأولياء، اللي إحنا سمناه الإلهام؛ لأن ده اللي هيلتبس معايا مع الأنبياء، ده شبه بتاع الأنبياء شوية، الباقين وسوسة وفطرة والكلام ده عادي، ده مفهوم، لكن اللي بيحصل مع الأولياء إيه الفرق بين اللي بيحصل مع الأولياء؟ يعني إحنا قلنا إن من أنواع اللي بيحصل مع الأولياء الإلقاء في الروح، زي حديث:

(إن روح القدس نفث في روعي أن نفسًا لن تموت حتى تستكمل أجلها وتستوعب رزقها...).

الفرق بينهم فرق مهم، إن الوحي الذي يأتي إلى الأولياء فيه حاجتين:

■ **أولاً: يحتمل الخطأ وقد يلتبس مع الهوى أو يلتبس مع أفكاره الشخصية.**

■ **ثانيًا: الوحي الذي يأتي للأولياء محكوم عليه وليس بحاكم،** هنفسرها دلوقتي، محكوم عليه وليس بحاكم يعني أنا بخضعه للشرع، مش هو اللي يخضع ليا، ليه؟

لأن ببساطة {أَلْيَوْمَ أَكْمَلْتُ لَكُمْ دِينَكُمْ...}، عشان كده هنقول في الآخر الإلهام للأولياء ليس مصدرًا للتشريع، لا يمكن أن يكون مصدرًا للتشريع، أولاً لأنه غير معصوم، ثانيًا لأن التشريع كمل، ثالثًا لأن أصلًا ده أنا بحاكم الإلهام ده إلى التشريع نفسه، فإذا وافق التشريع قلت هذا إلهام من الله، وإذا

خالف التشريع قلت هذا الإلتباس إما من الشيطان أو من الهوى.

إيه الدليل على إن الإلهام الذي يحصل للأولياء قد يحتمل الخطأ؟

نشوف دلوقتي سادات الأولياء حتى الأولياء أنفسهم اللي هم ناس مثلاً زي الحواريين أنفسهم طلبوا طلب في الآخر {أَنْزَلَ عَلَيْنَا مَائِدَةً مِّنَ السَّمَاءِ...} فدي بردو حاجة كده من أنفسهم.

فخلينا نتكلم عن سادات الأولياء في هذه الأمة وهما عمر وأبو بكر، عمر وأبو بكر سادات الأولياء بلا شك مفيش كلام، عمر هو يسمى مُلهم أصلاً: (إياكم في أمتي ومحدثون فعمر، إنه كان فيمن كان قبلكم محدثون).

محدثون يعني ناس بيجي لهم إلهامات عالية أوي بقى، كثير بتتابع، مش مرة ولا مرتين لا ده كثير..

(وإياكم في أمتي محدثون فعمر)

وكان عمر طبعاً له موافقات عمر للقرآن كثير، كان ممكن كده يقول يا رسول الله لو أننا اتخذنا من مقام إبراهيم مُصلي؛ فتنزل آية اتخذوا من مقام إبراهيم مُصلي، هو جت له الفكرة فيه من الله جت له كده، سبقت الوحي، يا رسول الله هل أمرت نسائك بالحجاب؟ فإنهن يدخلن عليهن البر والفاجر؛ تنزل آية الحجاب:

{وَإِذَا سَأَلْتُمُوهُنَّ مَتَلَعًا فَاسْأَلُوهُنَّ مِنْ وَرَاءِ حِجَابٍ...}

سيدنا عمر يقول وددت لو أن الله أنزل في الخمر أمراً شافياً، فتنزل: {يَا أَيُّهَا الَّذِينَ ءَامَنُوا إِنَّمَا الْخَمْرُ وَالْمَيْسِرُ وَالْأَنْصَابُ وَالْأَزْلَمُ رِجْسٌ مِّنْ عَمَلِ الشَّيْطَانِ فَاجْتَنِبُوهُ لَعَلَّكُمْ تُفْلِحُونَ}

هو بيجي له إلهامات كده، طيب أبو بكر طبعاً ده أعلم المفروض من عمر، تقول لي طب هو ليه بقى مش مُلهم ولا محدث؟

خد بالك بقى هقول لك جملة تكتب بماء الذهب؛ لأن دي بردو بتلتبس على الناس أحياناً، إزاي سيدنا عمر مُلهم ومحدث وأبو بكر مش مُلهم وهو أفضل منه؟

بلا شك بمراحل لو وضع ميزان إيمان أبو بكر في كفة وميزان الأمة في كفة لرجح ميزان أبو بكر، ابن تيمية بقى قال كلام يكتب بماء الذهب جملة كده كتاباته تفسر لك الموضوع ده، قال: **(وأما أبو بكر فقد استغنى بمنزلة الصديقية عن منزلة الإلهام)** فهمت حاجة؟

يعني عايز يقول أصلاً هو معدي المرحلة دي، أنت عاوز مثلاً جاي تقول كده لواحد عادي يقول لك أنا معي دكتوراة، فأنت تقول له طب خدت ماجستير؟ ما هو ما ده مش سؤال.

أنا الصديق أصلاً، يعني اللي هو أنا معدي المرحلة دي.

■ ابن تيمية بيقول كده، بيقول **وأما أبو بكر فقد بلغ منزلة الصديقية،** دي منزلة محدش وصل لها أصلاً..

يعني دي منزلة لوحده فيها؛ لأن ده الوحيد اللي مترددش عندما ورد عليه الإسلام، ده الوحيد اللي صدق النبي ﷺ في الإسراء بدون أي تردد، ده معدي كله، مفيش حد وصل للحنة اللي هو قاعد فيها دي لوحده، فدي معدية أصلاً منزلة الإلهام، اللي هي المنزلة اللي اسمها الصديقية، فابن تيمية بيقول: وأما أبو بكر فقد استغنى بمنزلة الصديقية عن منزلة الإلهام، عايز يقول هو معدي الحنة دي، يعني هو ملهم طبعاً، يعني هو معدي أصلاً المرحلة دي هو شفاف لدرجة يعني عالية جداً، فده بيفسر لك إن أبو بكر ليه متوصفش بالملهم؟

لأنه الصديق، فالصديق تغني عن لقب الإلهام، طيب إحنا بقى بنتكلم في الاتنين السادة دول، الاتنين غلطوا قبل كده، وده مشهور بقى أوي، ومن أشهرها غلطة عمر -رضي الله عنه وارضاه- في الحديبية، ده غلطة كانت رهيبة جداً، وده سيد المُلهمين يعني مع أبو بكر، بس مين اللي أصاب يومها؟ أبو بكر، عشان كده تعرف إنه معدي، ده كله وقع ماعدا هو، هو الوحيد اللي عادي جداً وشايف كل حاجة صح، وكل حاجة مضبوط، والدنيا ماشية تمام، ومفيش مشكلة خالص، ما لكم يا جماعة؟

إنه رسول الله، وإن الله ناصره، فالزم غرسك يا عمر، الموضوع كان بسيط

جدًا عند أبو بكر، شافيف كل حاجة ماشية صح، أنتم ما لكم في إيه؟ أنتم ما لكم متوترين ليه كده؟ الوحيد اللي كان ثابت يوم موت النبي ﷺ، أبو بكر له مقامات عالية جدًا، عمر -رضي الله عنه وارضاه- لما كان بيضطرب أبو بكر كان بيثبت، لا معدي فعلاً فعلاً، عمر -رضي الله عنه وارضاه- مثلاً اخطأ في صلح الحديبية لما أنكر على النبي ﷺ نفسه، طب ده أنت ملهم، بس الإلهام هنا اخطأ، هو بيقول له لِمَ نعطي في ديننا الدنيّة؟

يعني هو معترض على الصلح، ورغم ذلك طلع هو اللي غلط، إذا أدي واحد ده مفيش يعني زيه، دعنا من أبو بكر الصديق، قارن عمر بأي حد بعد كده خلاص بقى، إذا كان ده غلط يبقى اللي بعده هيغلط، متجلبش بقى واحد ولى عنده عشرين أو ثلاثة وعشرين ويقول لك أنا جامد جدًا مبغلطش، معلش ده إحنا سيدنا عمر غلط، يعني ما خلاص بقى، مفيش حاجة اسمها أنا ملهم الإلهام حدثني قلبي عن ربي وأنا إن شاء الله كده يا جماعة مش هصلي من النهاردة خلاص، ربنا قال لي متصلش أنا مع نفسي، لا أنت كده فاهم فمتهزersh خلاص، إحنا قلنا الإلهام على عينينا وعلى رأسنا ويحصل للأولياء، بس مقدرش اعتبره مصدر للتشريع، وإلا سيدنا عمر نفسه اخطأ، سيدنا عمر نفسه أنكر على أبو بكر حروب مانعي الزكاة، أنكر عليه جدًا، وكان مش موافق خالص بالموضوع ده، وأبو بكر هو اللي أصاب، وقال له لا هقاتل مانعي الزكاة هقاتلهم يعني هقاتلهم (والله لو منعوني عقلاً كانوا يؤدونه لرسول الله ﷺ لقاتلتهم عليه)، وعمر معترض جدًا، إزاي تقاتل بني آدم بيقولوا لا إله إلا الله، قال له ماشي بس منعوا الزكاة، وأنا مأمور إن أنا أقاتل مانعي الزكاة، وطلع عمر هو اللي اخطأ وأبو بكر أصاب، وممكن أجيب لك كذا موقف سيدنا عمر في القصة دي وطبعًا ده يعني لا يقدر فيه جلالته -رضي الله عنه وارضاه-، العكس بقى إيه رأيك بقى إن سيدنا أبو بكر نفسه عمر غلبه في مرة في الإلهام، أو في كان فعلاً رأيته هو الأصوب، لما عمر طلب من أبو بكر جمع القرآن، وأبو بكر هو اللي كان رافض، يعني هو ده بقى ده التقييل أوي ورفض،

بيقول (فما زال بي عمر حتى انشرح صدري) يعني هو اللي اقنعني بالعافية، مع إن أنا مكنتش مقتنع خالص، وطلع عمر -رضي الله عنه- هو اللي أصاب وفعلاً كانت المصلحة في جمع القرآن، بل أبو بكر الصديق مرة مع النبي ﷺ كان قاعد مع ناس

فحكوا له رؤى، وكان النبي ﷺ دائماً يقول للناس من رأى منكم الليلة رؤية يقصها علي وكان يفسرها لهم ﷺ، فمرة النبي ﷺ قال لأبو بكر فسر، يعني اداله فرصته، ففسر أبو بكر بعض الرؤى، فقال النبي ﷺ يا أبا بكر أصبت في بعض واخطأت في البعض الآخر، إذاً اخطأ في تعبير الرؤية، فالشاهد يعني اللي عايز أقوله إن إذا كان ده حصل، وطبعاً دي حاجات نادرة يعني، إحنا مش بنقدح دول على طول الخط اللهم بارك يعني (عليكم بسنتي وسنة الراشدين المهديين من بعدي) ..

الناس دي مبتغلطش في الشريعة، لكن عايز أقول إن حاجة زي الإلهام هم أنفسهم مبيقولوش إن إلهامنا ده تشريع، وإلا أبو بكر لما كان بيجادل هو مش بيجادله على إن أنا صديق فأنت خد كلامي مسلمات، بيتكلم على إن برده ده اجتهاد، بس طبعاً لما أقول اجتهاد أبو بكر فأنت تقف تفكر كويس قبل ما تتكلم، لما أقول لك اجتهد عمر تفكر كويس قبل ما تعترض؛ لأن ده فاهم، لما أقول لك بقى الخلفاء الراشدين مع بعض يتفقوا على حاجة يبقى انسى مستحيل تكون مخالفة للإسلام..

فاللي عايز أقوله الناس دي فعلاً كانوا بيوافقوا الشرع، دول ناس موافقين للشرع تماماً، وإلا فالنبي ﷺ أحالنا إلى هديهم، ولكن هم في بعض الاجتهادات لما هم أنفسهم يختلفوا فيها هتلاقي في واحد أصابهم منه وأكد واحد أخطأ، فاللي عايز أقوله أولاً كذا حاجة إن المنامات الإلهامات اللي بتحصل كذلك، المنامات نفس الحكم ما هو المنام زي الإلهام، فالمنامات اللي بتحصل للأولياء قد تكون من الله، وقد تلبس عليهم إن هي من هوى النفس أو من أي سبب آخر، زي حديث نفس، فممكن تكون من الله وممكن تكون من غيره، فإذا أنا عايز أقول القاعدة إن مفيش حد يجي بعد موت

النبي ﷺ يقول أنا بقى عندي مصدر من المصادر التشريع وهو الإلهام أو الذوق أو الوجد أو المنال.. ودي أحد أصول الصوفية.

هو ده بقى اللي عايز أوصله في الآخر، أحد أصول الصوفية، إحنا عندنا أصول بنختلف فيها مع المتصوفة، من أصول أهل السنة إن المصدر تشريع: القرآن والسنة والإجماع والقياس، وبعض المصادر الثانية مختلف فيها زي قول الصحابي والاستحسان والاستصحاب والكلام ده،

لكن الصوفية طبعًا اللي فاهمين في أصول الصوفية عندهم من الأصول إن من المصادر الإلهامات والمكاشفات، هتسمع دي كتير، والمنامات، وإن هم عندهم الحاجات دي صادقة، إذا حصلت للأولياء فإنه يؤخذ بها مباشرة، وأما أهل السنة فيقولون هذه المنامات لا تصلح أن تكون مصدرًا للتشريع، وإنما أقصى ما يقال فيها أنها يستأنس بها أحيانًا، يعني لو عندي اجتهادين ومتشككت فيهم فجاء اجتهد معه إلهام أو منام هنقول نميل لده شوية مش مشكلة، الأمر الثاني إن المنام محكوم عليه، أو الرؤى أو المكاشفات دي محكوم عليها بالشرع، فإذا وجد أن أحد هذه الإلهامات، أو المكاشفات صادم نص، أو صادم إجماع، أو صادم قياس جلي؛ فإنه يُطرح ويرفض تمامًا، فلا يقال إن هو إنما بس ده ما دي مكاشفات دي زي الإجماع، طبعًا لا، هي بتعرض على الكتاب والسنة والإجماع إذا اصطدمت مع الكتاب والسنة والإجماع يبقى تُطرح ولا يعتبر بها، فهمتوا الفرق بين دي ودي؟

فإذا عند أهل السنة الإلهامات لا تصلح مصدر للتشريع؛ لأنها قابلة للخطأ، أصلًا التشريع كامل فأنا مش محتاج حاجة، لكن إيه دورها بقى؟ الاستئناس بها زي اللي حصل في أم موسى، استأنست باللي حصل معاها في قرار خطير جدًّا، إن أنا ممكن يكون عندي حاجتين بفكر فيهم فألهم بحاجة منهم، خلاص امشي وراء دي، ودي معاها إلهام دي معهاش، أنا مثلاً يعني في قولين في الشريعة وأنا محتار أنهي الراجح، ربنا يهديني لده أحس إن أنا ميلت لده، في حاجة كده في نفسي ممكن خلاص مش لاقى مرجح غير كده،

لكن ده مش تشريع، إن أنا ايه زي ما قلت لك هي بتستأنس بها بس، ممكن تبقى تساعدني في حاجة معينة، أما إن هي تكون مصدر مستقل؛ فلا.

ندخل بقى على مرحلة بداية دعوة النبي ﷺ، إحنا قلنا إن خلاص هو نزلت عليه:

{يَا أَيُّهَا الْمُدَّثِّرُ (١) قُمْ فَأَنْذِرْ (٢) وَرَبَّكَ فَكَبِّرْ (٣)}

هييتدي ينطلق عليه ﷺ في الإنذار، أول ما بدأ النبي ﷺ في الإنذار في المرحلة الأولى، وهي مرحلة الدعوة والسرية الشديدة في الدعوة كمان، إحنا عندنا كذا مرحلة، المرحلة الأولى كانت سرية خالص اللي هي ما بين أهله وأصحابه المقربين بس، بعد كده في مرحلة اللي بعد كده بدأ ينتشر في الأسرة الأكبر شوية اللي هي بعد قوله تعالى: {وَأَنْذِرْ عَشِيرَتَكَ الْأَقْرَبِينَ} فبدأ يجمع أعمامه والدائرة أوسع شوية، وبعد كده المرحلة الأوسع {فَأَصْدَعْ بِمَا تُؤْمَرُ وَأَعْرِضْ عَنِ الْمُشْرِكِينَ} دي بعد تلت سنين، دي اللي هي خلاص قول بقى للناس كلها، فإحنا لسه في مرحلة الإبتدائية خالص، اللي هو يادوبك بيتكلم بشكل فردي جدًا مع المقربين منه، تعالى نشوف النبي ﷺ إيه المنهج اللي هيمشي به في الدعوة دي..

أول حاجة بدأ بها النبي ﷺ أقرب ما يمكن، يعني شوف هتلاقي حركة النبي ﷺ في الدعوة بيتحرك بمسطرة فعلاً، يعني فعلاً ببداً بالأقرب فالأقرب فعلاً، هيخلص بيته الأول قبل ما يطلع بره البيت، فأول من بدأ به ﷺ وأول من أسلم مطلقاً بالإجماع هي خديجة -رضي الله عنها وارضاهـا-، وهذه مفخرة للنساء الحقيقة، لو لم يكن للنساء إلى الآن أن أول من أسلم على الإطلاق امرأة يعني يكفي هذا للنساء أن تفتخر على الرجال ما دامت الحياة، أن أول من أسلم مطلقاً خديجة، وده يدل على حاجة، إن المفترض إن أقرب حد للرجل إيه؟ زوجته، بعض الناس يعتبر أصحابه أهم من مراته، لا بعض الناس يعتبر مثلاً أهله، لا دائماً مراتك أقرب حد لك، دي صاحبك

{وَصَاحِبَتِهِ وَبَنِيهِ} المفروض دي تبقى بينك وبينها صُحبة وعشرة وجمال وخير وأم ولادك، فدي أولى الناس، ودي برود رسالة بنبعتها لكل واحد يعني له عمل دعوي بره بيته، أو له خير بره بيته، بيتك أولى بكل حاجة، مش بقول لك امنع بره، بس بقول لك يعني إزاي بره أنت شغال دعوة وبيتك مبتدلو ش نصيب من الدعوة!

إزاي كل الناس بره شايفاك كريم وهدايا وخير.. وزوجتك متجبلهاش هدية ولا بتكرمها؟! بره بتفسح أصحابك وبتعزمهم وبيتك متفسحش بقاله أد إيه؟! ميصحش كده، زوجتك أولى بالخير ده.

حديث النبي ﷺ **(خيركم خيركم لأهله)**، دائماً الأخلاق الحقيقية بتبان مع أهلك، هم أولى بتعليمك، أنت هتتسأل عن دول، اللي بره في غيرك يكلمهم، لكن اللي جوه مفيش غيرك، اللي بره في غيرك يصرف عليهم، اللي جوه ملهمش غيرك، فأنت هتتسأل عن اللي جوه، واللي بره كلنا هتتسأل عليهم ده فرض كفاية، لكن أهلك ده فرض العين بتاعك، فرض العين يُقدم على الكفاية، فأنا عايز اقول اهتم بزوجتك أوي، أول من بدأ به النبي ﷺ قال أقرب حد له خديجة، أقرب حد له فعلاً، آه أبو بكر صاحبه والكلام ده كله بس أقرب حد أقرب حد كانوا كمكان وكلام ووضع وكلقاء كانت خديجة، فأول ما بدأ دعاها وأسلمت فوراً -رضي الله عنها وارضاهـا-، وكانت هي أول من أسلم اه هذه المرأة الكاملة، ثم كملت بعد ذلك وأخذت الشهادة العظيمة **(لم يكمل من النساء إلا أربع، وذكر خديجة وفاطمة ومريم وآسيا امرأة فرعون)** فدي خديجة، تفتكروا مين رقم اتنين أسلم على الصحيح؟

يعني والله -تعالى- أعلم كان ثاني من أسلم علي بن ابي طالب، خلي بالك إحنا لازم هيبدأ بالبيت، علي ابن ابي طالب هو ثاني حد أسلم بعد خديجة وبدأ به النبي ﷺ، والعجيب أن علي بن ابي طالب عنده كم سنة في الوقت ده؟ عشر سنوات، عشر سنوات فقط! تخيل!

بدأ به النبي ﷺ إن هو طبعًا واعٍ، وقد يكون بلغ والله -تعالى- اعلم، هو يُقال إن هو أول من أسلم من الأطفال، لعله سيكون بلوغه في سن عشر سنوات، لكن هو واعٍ جدًا، طبعًا سن عشر سنوات ببتكلم في قریش، يعني يفكر تفكير الرجال تقريبًا، يعني خلاص عقله مكتمل في الزمان والمكان ده مش زي عشر سنوات عندنا، فبيكون كمل الشخص عشر سنوات فكلام النبي ﷺ بيتعامل معه كأنه راجل كبير يعني، وفعلاً أسلم علي بن ابي طالب، **وعلي بن ابي طالب أصلاً طب وإيه اللي جابه جوه بيت النبي ﷺ؟ هو بيربيه أصلاً ﷺ، طب بيربيه ليه؟**

الموضوع ده قديم، أصل الفكرة إن هو علي بن ابي طالب، فأبو طالب كان فقير، هو أصلاً كفل النبي ﷺ صرف عليه فترة طويلة، لغاية ما النبي ﷺ قام على رجله، وبقي له وضعه، وبقي له دخل، والدنيا استريحت معاه زي ما بيقولوا كده، عايز يرد الجميل لابو طالب، هو شايفه لسه حالته زي ما هي، والراجل صرف عليل وتعب معي، فراح عمل مبادرة هو والعباس، طبعًا أبو طالب رجل متعفف، فقالوا له طب خلاص إحنا نكفيك ولادك، قالوا له إحنا كل واحد فينا ياخذ واحد منهم، طب أنت شوف أنت عايز مين وإحنا ناخذ الباقي، قال لهم سيبوا لي عقيل، عقيل بن ابي طالب كان هو ده أقرب حد له، فسابوا له عقيل، والنبي ﷺ أخذ علي، وقيل إن العباس أخذ جعفر، فبقى جعفر عند العباس، وعليّ عند النبي ﷺ، وعُقيل عند ابي طالب، وفعلاً فضلت الحياة كده، وعلي من وهو صغير بيتربي في بيت النبي ﷺ..

عشان كده كان هو ده الأولى بفاطمة لما جه، على فكرة فاطمة قبل ما تتزوج علي طلبها أبو بكر وطلبها عمر، دي المعلومات الغير مشهورة يعني، أبو بكر طلبها لنفسه، وعمر طلبها لنفسه، فالنبي ﷺ كان يعتذر لهم بلطف، ويقول إنها صغيرة، فهو كان عارف إن علي بن ابي طالب سيطلبها في يوم من الأيام وانتظروا فعلاً حتى طلبها ووافق عليه، إن هو أنا مربيه في البيت وطبعًا هو متربي مع فاطمة هم أولى ببعض، يعني زي ما بنقول كده

عارفين بعض، متربين مع بعض، فاطمة سنّها كان كام أصلاً دلوقتي؟
خمس سنوات، فاطمة أصغر من علي بن أبي طالب بخمس سنوات، فهي
دلوقتي عندها خمس سنوات، عشان كده مش بتذكر في اللي أسلم؛ لأن هي
طبعاً مفيهاش وعى تقريباً على حاجة في السن ده، لكن خاينا نكمل وهقول
لكم البيت بعد بقيته، خلاص علي بن أبي طالب أسلم وعرفنا أصلاً إن هو
اللي جابه في هذا البيت.

اللي أسلم بعد كده زيه كان زيد بن حارثة؛ لأنه برودو ده في البيت، زيد بن
حارثة اللي هو الآن هو زيد بن محمد، هو لسه منزلش تحريم التبني، هو
دلوقتي ده بقى بيتعامل كالأبن فعلاً، يعني علي بن أبي طالب لسه زي ما
هو، لكم لا ده زيد بن محمد، وخلاص هنتعامل معه على إنه ابن عادي
جداً، ده وقت قصته قديمة بقى.

قصته إن حكيم بن حزام مرة كده كان في طلعة من طلعاته حكيت إن حزام
ابن أخو خديجة يعني خديجة تبقى عمته، خديجة عمه حكيم بن حزام، فحكيم
بن حزام كان في طلعة كده من طلعاته اشترى عبيد، فكان زيد بن حارثة
ممن أسر في أحد معارك العرب، وهو كان كريم ابن كرماء، فتأسر واتباع،
فراح اتباع لحكيم بن حزام، ورجع به حكيم بن حزام عايز يكرم عمته قال
لها أنا جبت شوية عبيد، اختاري واحد منهم لك هدية، ف راحت قالت له هات
زيد ده شكله جميل وطيب، خدته شوية و راحت هي نفسها أهدته للنبي ﷺ
كهدية، طبعاً زيد بن حارثة حاجة جميلة يعني، هدية راقية جداً، عبد طيب
وطيع وقوي وكل حاجة، فأهدته هدية للنبي ﷺ، فالنبي ﷺ فضل معه فترة،
أبوه بقى كان بيدور عليه كل ده لغاية ما لقاه عند النبي ﷺ، وعرف إن هو
في مكة، راح رايح مكة فضل يتتبع بقى الآثار والناس ويسأل العرب لغاية
ما وصل له، ووصلوا ولقاء حميم والأب والكلام ده.

وبعد كده قال له يلا بنا، قال له لا أنا هقعد هنا، قال له إزاي؟ **قال له لا انا
هقعد هنا، قال له تقعد في هذه العبودية؟**

قال والله لقد رأيت من هذا الرجل أمورًا والله لا أتركه أبدًا، تخيلوا بيتكلم وهو عبد!

أومال يعني تخيل واحد يعيش عبد مع النبي ﷺ أحسن ما يعيش مع أبوه حُر! ده إيه المعاملة اللي بيشفوها بقى والجمال والأخلاق والصفات الجميلة اللي بيشفوها؟!!

الواحد يحب النبي ﷺ أوي، إذا كان واحد كان عنده عبد فضله على أبوه، أومال بقى يعني زوجته شافت منه إيه؟! وولاده شافوا منه إيه؟! فطبعًا النبي ﷺ بعد كده بقى زيد ده كبر أوي في عينه، ده أنا اختارني عن أهله، فراح اعتقه وتبناه ﷺ، كرم بقى أنت عملت معي إحسان ودي عادته من قبل البعثة، إن هو مفيش أحد يبقى له جمایل عليه ﷺ، لازم يرد الجمایل ﷺ، الوحيد اللي معرفش يرد جمایله هو واحد بس وطلع على المنبر وقالها صريحة، قال:

(ما من أحد له يد علينا إلا كافئناه بها، إلا أبو بكر -مش عارف اعمل معه إيه- له يد علينا يكافئه الله بها)

ده الوحيد اللي كل ما استطيع معرفش أرد له جمیله، أنا قلت لك ده في حتى تانية، خلینا دلوقتي فزید بقى زید بن محمد، ما خلاص ده قاعد في البيت معنا فده بدأ به ﷺ ودعاه إلى الإسلام فأسلم بردو على طول، ما اتحكاش بقى هم بناته أسلموا في انهى بالظبط أصل أنا متوقع إن هم أسلموا في المرحلة دي؛ لأنه مش متوقع إن هو يكون طالع بره خاصة مع وجود خديجة اللي اتحولت أكيد لداعیه على طول مع البنات، ما دي دي أقرب واحدة للبنات، أكيد هي طلعت ويمكن میذكرش لأن يمكن يكونوا دول ثمرة خديجة يعني، بردو الأم هي اللي بتتولى بعد كده، خلاص هي خدت الباب راحت للبنات كلمتين والموضوع أكيد خلص بسرعة جدًا يعني، فمتوقع إن زینب وأم كلثوم ورقية أسلموا بسرعة جدًا، وأما فاطمة كانت صغيرة كده.

بعد كده هتبدأ دعوة النبي ﷺ تطلع بره البيت، فأول من دعاه أبو بكر

الصديق، ده أقرب واحد له برة البيت، منطقي جدًا كل حاجة منطقية، عشان كده يقال أبو بكر أول من أسلم من الرجال، المقصود الرجال الحرائر، لما زيد أول من أسلم من الموالى اللي هم كانوا عبيد يعني، وعلي أول من أسلم من الأطفال، وخديجة أول من أسلم من النساء أو أول من أسلم مطلقًا، فأبو بكر أول مدرسة من الرجال الأحرار خارج بيت النبي ﷺ، إسلام أبو بكر كان مميز جدًا، النبي ﷺ عبر عنه بقول: قال ما من أحد عرضت عليه الإسلام إلا تردد..

تردد يعني فكر مش اعترض، خد مع نفسه كده شوية ولو حاجة بسيطة قعد يقبلها في النوم وبعد كده يقتنع وبعد كده يسلم عادي، أبو بكر حتى دي محصلتش، مفيش حد عرض عليه الإسلام مفيش حد كله بلا استثناء عرضت عليه الإسلام إلا كان له كبوة، يعني خد وإدى مع نفسه يعني تردد ولو يسيرًا، إلا أبو بكر ما تردد قط، يعني مخدش ثانية في الكلام، هو كده على طول يا أبو بكر، ده شخصية فريدة من نوعها.

المهم أبو بكر الصديق خد الدعوة من هنا طالعة بدأ يتحرك في خدمة الإسلام، أبو بكر الصديق قلب الدنيا، بس أنا عايز أقول لك معلومة كده طبعًا أبو بكر الصديق بدأ يشتغل في الدعوة، ومعلوم إن ثمرته في أول يوم من الدعوة كان خمسة من العشرة المبشرين بالجنة، يعني هو جاب خمسة وهو السادس، يبقى خمسة من العشرة المبشرين أسلموا على يد أبي بكر الصديق -رضي الله عنه وارضاه-، تخيل بقى مين فيهم؟ عثمان، تخيل رجل يبقى في ميزانه عثمان! يعني نعمل إيه؟! إحنا بقى نروح فين؟!

ده هو أحد الناس اللي في موازين حسناته عثمان بن عفان نفسه، ده واحد من الناس اللي في ميزان حسنات أبو بكر الصديق، لما أقولك إنه في حنة ثانية هيبقى في حنة ثانية فعلاً، ده واحد من اللي في ميزان حسناته نص العشرة المبشرين!

ده يتقارن بمين أصلاً! ده مفيش وجه مقارنة مع أي حد!
يعني أنت مهما عملت هتقارني بعثمان بن عفان إذا كان كل عمل عثمان
في ميزانه، هتقارني مع طلحة؟

طب ما هو كمان في ميزانه، لما طلحة ده أصلاً أسلم بسبب أبو بكر
الصديق، هتكلمني عن الزبير بن العوام وفروسيته وكل الجمدان ده.. طب
ما هو ده بردو في ميزان حسناته، سعد بن أبي وقاص.. خالد.. يعني ما هو
نفس الكلام، فمن بقى اللي دعاهم؟

دعى عثمان -رضي الله عنه وارضاه-، **عثمان كان عنده كم سنة في
الوقت ده؟**

أربعة وتلاتين سنة، ودعى الزبير بن العوام اللي كان عنده اتناشر سنة في
الوقت ده، فأسلم ودعى عبدالرحمن بن عوف، آه يا سلام!
ده كفاية والله، كان عنده تلاتين سنة عبدالرحمن بن عوف في الوقت ده،
ودعى سعد بن أبي وقاص، كان صغير سبعناشر سنة، سبعناشر سنة
والزبير اتناشر سنة، ودعى طلحة بن عبيد الله كان عنده في الوقت ده تلتناشر
سنة، خد بالك!

أبو بكر عنده كم سنة أصلاً دلوقتي؟

أبو بكر حوالي سبعة وتلاتين ونص؛ لأن هو أصغر من النبي ﷺ تقريبا
بسنتين ونص، يعني بنتكلم في ثمانية وتلاتين سنة، إزاي دعى واحد عنده
اتناشر.. وسبعناشر.. وتلتناشر.. وتلاتين.. وأربعة وتلاتين.. رجل دولة!
رجل علاقاته بكل الناس، طوب الأرض بيحبه، طوب الأرض بيحب أبو
بكر الصديق، أبو بكر اللي معرفش المشركين يعملوا معه حاجة، أبو بكر
محدث يعرف يعمل معه حاجة أصلاً من حُب الناس فيه، حتى بعد ما أسلم
ده خط أحمر بالنسبة لكل الناس.

أبو بكر الصديق ده لما شتم الراجل في يوم صلح الحديبية الراجل مردش
عليه، قال له مين اللي بيشتمني؟ قال له ده أبو بكر، قال لولا يد لك عليا في

الجاهلية ما كفتك بها رددت عليك، يعني حتى أبو بكر له جمایل على الكافر، محدش عارف يعمل معه حاجة، مقدرش ارد عليك، إيه الجميلة اللي عملها فيك لدرجة إن لما يشتمه ميردش يرد عليه؟ خيره على الناس كلها، بيقالك في الكتاب: أبو بكر الصديق كان رجلاً محبوباً سهلاً، ذا خلق ومعروف، وكان رجال قومه يجتمعون عندهم، ويألفهم، ويألفونه، وكان صاحب علم، وصاحب تجارة، جميل المجلس، طيب المعاشرة، حسن الخلق، هو ده أبو بكر الصديق، هي دي بضاعة أبو بكر الصديق في الدعوة إلى الله، ودي النقطة اللي قلتها لك هتستتاني وهرجلك وأقول لك الداعية المفروض يبقى عامل إزاي، هو ده أبو بكر الصديق، أبو بكر الصديق ملك القلوب قبل أن يتكلم، اللي هو أنت أي حاجة هتقولها لي أنا معك، قبل ما تتكلم أنا معك، ما أنت مش ممكن تورطنا أبداً، أنت اللي زيك مينفعش إن واحد يقول له لا أصلاً.

أبو بكر الصديق ارتكز على منظومة أخلاقية بيعامل بها الناس دي، عشان كده دعوته جابت نتيجة عالية جداً وبسرعة رهيبة جداً، أبو بكر الصديق ده بيكلم أي حد بيستجيب، أبو بكر الصديق كان بيصلي في مكة بس كان الناس بيجمعوا حوله، والناس حتى خافوا إن هما يدخلوا الإسلام بسبب صلاته، وراحوا يتوسطوا ويقولوا له معلىش بس صلي جوه البيت، أنت متخيل!

يعني جايين وسايط عشان أرجوك متصليش في الطريق بس، متصليش في فناء بيتك، عشان كل اللي بيعدي من الناس بيقد عندك، كالعادة بيقدوا يسمعوا القرآن، فأنا خايف الناس تدخل الإسلام بسبب صلاتك، لو سمحت ادخل صلي جوه بيتك الكبير، أبو بكر ده موضوع كبير جداً، لدرجة إن حتى في الرحلة تشوف في الهجرة لما هاجر النبي ﷺ فبيقولوا وكان أبو بكر رجلاً معروفاً، والنبي ﷺ ليس بمعروف، فكان الناس يسلمون على أبي بكر وبجواره النبي ﷺ، رجل عالمي مشهور جداً لدرجة الناس عارفينه

وفاكرينه هو ده الرسول من شهرته، ومن سمته طبعًا، سَمَت عالي جدًا، سَمَتَه قريب من النبي ﷺ، سَمَت عالي وأخلاق عالية، راجل فخم أوي يا جماعة، يعني وعلاقاته قوية جدًا بكل مستويات المجتمع، ده راجل بيكلم اللي عنده اتناشر واللي عنده سبعتاشر، هو ده الداعية كده، الداعية مش بيقصر على حاجة معينة، بيكلم الصغير والكبير والكبير أوي، ويعرف يدخل على الناس الثقيلة في التجارة، ويعرف يدخل على النبي آدم البسيط، يعرف يكلم الطبقات كلها، يعرف مدخل ده ومدخل ده ودماغ ده ودماغ ده، وبيرتكز على مرتكز من الأخلاق، صدقني الدعوة إذا افتقدت الأخلاق افتقدت أكبر وأهم مقوم لها؛ لذلك إحنا قلنا إن أصلًا دعوة النبي ﷺ اتبنت على أخلاق برود، ما هو زيه برود هيبني أدواته على أخلاق، لما قال لهم: (لو أخبرتكم أن جيشًا زار الوادي تُغير عليكم أو كنتم مصدقي؟ قالوا له أنت بالذات أنت مفيش كلام عليك، قال لهم طب أنا رسول..)

فاللي حصل كان العند بس، لكن لو هو ارتكز في كلامه على أخلاق، أخلاقي أنا ينفع واحد زيي يكذب؟ أنا ينفع أكون بضحك عليكم؟ ويقول لهم الرائد لا يكذب أهله، أنا مينفعش أكذب عليكم وأنتم عارفين كده كويس، وأنتم عارفيني كويس، إذا معرفة المدعو بحال الداعية مؤثرة جدًا في قبول دعوته؛ لذلك المفترض إحنا كدعاة أو عمومًا كل المسلمين دعاة، مش الدعاة اللي هم ناس فيها معينة..

لازم نرتكز على النقطة دي يا جماعة ونبني عليها، لازم الناس تشوف مننا أخلاق، زي ما يوسف -عليه السلام- بنى دعوته في السجن على أخلاق:

{إِنَّا نَرَاكَ مِنَ الْمُحْسِنِينَ}

ده قبل ما يتكلم، يعني ده العادي بتاعك، إذا هو كل يوم بيطلع أخلاق بس، بيزورهم ويجامل ويدي له أكله وبتاع، كسب الناس بأخلاقه الأول، قبل ما يتكلم كلمة في التوحيد كل ده، إذا هو بيأسس الأول أخلاقه، وبعد كده هكلمكم، فلما يجي يتكلم يتقابل عادي، حتى لو مستجبتش بس أنا مقدرش أقول لك حاجة، أنت راجل كلامك على العين والرأس، أنا آه مش قابل بس

أنت مثلك لا يرد، فأحنا عايزين ناس كده متبقاش ناس متحفزة لنا، عندهم عداء ما بيننا وما بينهم عشان إحنا بنستعلي عليهم مثلاً، أو شايفين إن الملتحيين أو الدعاة أو الناس السننيين دول بييصوا لنا من فوق، بيعاملونا من فوق بيستحقرونا، بيكفرونا ودائماً، محسسينا إن إحنا أقل منهم، ده بيقل على طول لقدامك، اقفلوا على طول.

لكن لما الناس تشوف مننا تواضع، وإحسان، وهداية، ووقوف في الأزمات، وغسل، وصدقات، وإطعام، وخير، وابقى بسلم عليهم وعلى اللي زيي ملتحي واللي مش ملتحي، والملتزم واللي مش ملتزم، وبضحك في وش ده وفي وش ده، عادي كل الناس عندي زي بعض، بل يمكن الناس بتشوف مني أكثر من اللي بيشوفوه مع الأخوة المقربين مني، على اعتبار دول في عشم ما بيننا ممكن أتك عليك شوية، لكن الثاني لا بطبطب عليه، الناس تعامله العكس يقول لك اطبطب على اللي قريب، اللي بره دول مش مهم، لا العكس، فدي اللي نرتكز عليها، فعايز إن إحنا نبقي فعلاً أخلاق..

أنا كنت أعرف بعض الدعاة أو بعض المشايخ كان لو عدى في الشارع كده رايح يصلي الناس تروح تصلي وراه، مبيتكلمش، بمجرد ما عدى بس، من كتر جمايله على الناس، يعني ده جمايله على الشارع كله، ليه جمایل على الناس كلها، ده لو عدى بس يصلي في ناس تتكسف لما بتشوفه، يقول لك إحنا لازم نروح نصلي مينفعش يا جماعة الراجل الشيخ فلان راح صلى، ويجري وراه يصلي، مبيتكلمش، ده بقى لو طلع يعاتب بس ويقولك مجتش تصلي ليه؟ من كلمة واحدة هتلاقي وشك يحمر ويصفر ويخضر، مع إن مقالش حاجة، بس أنت عارف الجمایل مينفعش تتكلم، مينفعش تقول له ملكش دعوة يا عم الشيخ، لأ في يد عليك، عشان كده أنت مثلاً راكب دلوقتي والخناقة الشهيرة بتاعة المشروع مثلاً والموسيقى والكلام ده، أنت في جيبك بونبوناية مثلاً وهدية وقدمتها قبل ما تتكلم هيحصل حاجة؟

أنت بعثت مع الأجرة بونبوني هيقول لك إي ده؟ قل له ده بونبوناية عشان خاطرك ياسطى، السكة صعبة الله يكون في عونك وبتاع، بس شوية كده قلت له متوطي الموسيقى شوية، هيقول لك حاجة؟

ولا يعرف يتكلم، خلاص أنت كسبته وخلاص، أنت ممكن حتى معكش حاجة في جيبك، وأنت قعدت جنبه وقلت له الله يكون في عونك ياسطى والله أنا بحبك في الله، ده أنت كان الله في عونك والطريق والدنيا صعبة، والحالة والبلد، والله أنا بدعي لك وربنا يديكوا الصحة، هيفرح بك أوي أنت عندك عيال؟ آه عندي عيالك، طب اسمهم إيه؟ ربنا يوفقهم يارب، أنت اديت مقدمة، أصل عادي مش لازم يطفى دلوقتي ممكن قبل ما أنزل، ما هي الفكرة إن أنا وصلت له رسالة بس، قلت لهم خلي بالك الأغاني شغل بدالها قرآن ربنا يهدينا ويهديك كلنا وحشين وبتاع، ممكن يرد عليك وحش؟ مستحيل!

فهي الفكرة أنت اسسني الأول وادينى أخلاق، وبعد كده اتكلم زي ما أنت عايز، لكن هي الشدة والغلظة أحياناً تبقى في وقت مش مناسب، وهو متعصب، مش دائماً هو اللي وحش، أحياناً أنت اللي كنت غلط، فدي مسألة مهمة.

طيب عايز أقول مسألة تانية، وهي أبو بكر الصديق بيخرجنا كلنا، إزاي بقى؟

أبو بكر الصديق اشتغل دعوة من غير أي مقومات، يعني قصدي المقومات اللي في بالنّا إحنا يعني، لا مسجد، ولا منبر، ولا مايك، ولا قناة على اليوتيوب، ولا صفحة على الفيس، ولا فولورز، ولا أي حاجة في أي حاجة، هو معه أخلاق، رجل تمام، ومعى لسان اتكلم به، اشتغل واحد لواحد، بيكلم كل واحد لوحده، ودعا إلى الله وطلع بحاجة لو قعدت طول حياتك تتسحل في الدعوة مش هتطلع بواحد من اللي طالع بهم أبو بكر الصديق، كل الكلام ده ومفيش إمكانيات صفر، دي رسالة لكل واحد موقف الدعوة على

الإمكانيات، يقول لك أصل في مساجد مضيق علينا فيها، أصل الدنيا واقفة، ما إحنا مفيش شغل دعوي دلوقتي، أي كلام بقى فاهم؟! حتى لو الكلام صح فيه تضيق آه في في المنابر والكلام ده ماشي، بس ممكن دعوة تقف، ما هي دي الفكرة إن هو وقف بسبب ان بعض الوسائل وقفت، أصل القناة عندي مش شغالة، أصل معيش مايك، أصل مش عارف أسجل اليومين دول، ما هذا؟ إيه ده؟

من الدعوة اه اللي هي الكلام، الكلام اللي إحنا بنقوله ده كل ده على الميديا هي مجرد دعوة عامة، ولكن لازم يبقى لك كده شغل خاص، الدعوة مبتقفش، وأنا دلوقتي لو الدنيا وقفت مع انت ده وقع كله، أو اتلغى أو الدنيا وقفت، أو حصل مصيبة في الدنيا لا قدر وقفت انت كله هنعمل إيه؟ مش هنشتغل؟ لا ده أنا عندي ناس ومتابع ناس والأسماء وهشتغل كمل عادي وهرضى بقليلي زي ما بيقولوا كده، هو لازم يبقى مية ألف مشاهدة عشان اشتغل؟

ولا لازم متئين ألف مشاهد عشان استفتح؟ ولا لو عندي واحد في المسجد مهتم به حلو، أنت لو عندك واحد زي الغلام اللي طلع بيه الراهب، ما هو الراهب ما قال لك هي غلام ده عامل به غلام ده طب غلام عمل ايه بقى بعد كده؟

قلب الدنيا، فيمكن ربنا يكرمك بواحد زي ده، فالي عايز أقوله إن الدنيا لما تقف تشتغل في بما نسميه الدعوة الفردية، إيه الدعوة الفردية؟ دي بقى الدعوة الفردية يعني واحد لواحد، دي الدعوة التي لا يستطيع احد ان يمنعها أبدًا، حد يقدر يمنعك نكلم اللي جنبك؟

مستحيل؛ أولاً لا تكلف مال، ولا تكلف وقت، لا تحتاج إلى إمكانيات، لا يستطيع أحد أن يرصدها، ده يوسف -عليه السلام- عملها في السجن اللي هو في السجن نفسه، أصل هتمنعني إزاي؟ أنا في السجن هدعو المسجونين، في المنفى هدعو الناس فيه، فدي مبتتمنعش ومبتقفش، ودائمًا لازم تعرف إن دي الأساس بتاعنا اللي أنت شغال به، اللي هو اللي هو ده

شغال على طول وكل ما بتتفتح وسيلة بنستغلها، في منابر يلا بنا، في مساجد يلا بنا، في تليفزيون يلا بنا، في فضائيات يلا بنا، اتاخذت دي بتاعة دي برجع لمين؟ العادي بتاعي اللي هو أنا أصلاً ده العادي بالنسبة لي، ده المخزون بتاعي، ده اللي أنا شغال فيه على طول مبيقفش، عارف بقى الغلط هيحصل إيه؟

إن أنت تغتر باللي أنت وصلت له فتوقف دي، وده للأسف بيحصل لما إحنا بنتغر بالميديا، إن اتفتح لك خد قنوات.. خد مش عارف إيه.. يلا وسع وسع وسع.. فيزهد اللي حصل له التوسع ده، يقول لك مع واحد واتنين وتلاتة والمجموعات الصغيرة دي لأ التانية دي حلوة دي، يبقى أنت كده بتقتل مخزونك الاستراتيجي، دي المفرة الحقيقية بتاعتك، ده الأساس اللي أنت بتشتغل عليه، اللي هو يقوم مرة واحدة كل ده يطير، هترجع عادي جداً، عادي أنا هكمل عادي في اللي كنت شغال فيه على طول، فإياك تفرط في الباب ده.

الباب ده مش مجرد باب، لما تبقى مضايق يبقى ده اللي موجود فتبقى زاهد أوي، لكن ده شغال على طول، المفروض دائماً أي داعية له ناس بيدعوهم فردي مهما كان مشهور، حتى أنت لازم يكون لك واحد صاحبك أو واحد في العيلة أخوك أقرب الناس لك بتختارهم وتنقيهم بعناية وتشتغل معهم وبتدعوهم إلى الله، زي أبو بكر كده اشتغل على أقرب الناس له، عثمان زبيد جابهم على طول موقفتش الدنيا، واحنا بعتنا تلت سنين عن الموضوع، ده تلت سنين مفيش أي منبر ولا في أي حاجة طالعة، أنا من تلت سنين بالسابقين الأولين اللي هما الأساس، اللي هما الأكابر، اللي هما قام عليهم الإسلام كله من غير لا منبر ولا مسجد ولا جيش ولا سلاح ولا أي حاجة ولا فيها حاجة خالص، مفيش غير الكلام بالبوق ودار الأرقم والكلام خلص، يبقى ده مسألة مهمة جداً.

المسألة اللي بعد كده اللي بتفيدني في الموضوع ده هو إن إحنا نطلع بمنهج

الأنبياء في التغيير، يعني لما تبقى الدنيا صعبة شوية، الدنيا قافلة الطريق، يبقى إيه التدرج الطبيعي للتغيير؟

إن إحنا عندنا على في أفكار دلوقتي في الطريق، في ناس يقول لك لازم الصدام على طول، اول ما نبدأ نبدأ بالصدام المسلح مثلاً، هل ده قام بعمله كده؟ هل شفتكم النبي ﷺ عملوا كده؟ معملش كده، فنبداً ننافس على السلطة على طول أول ما نبدأ، طب لما الدنيا تبقى مقفولة قوي ومفيش نفس هل على طول نقفز ونبدأ من فوق؟
ده مشفناش نبي عمل كده.

شوفت النبي ﷺ بدأ من فوق؟!

لا، إنما دائماً البداية من تحت، عشان كده أقول لك التدرج الطبيعي لما الدنيا تكون قافلة كأننا بنبتدي من الصفر.

نبدأ بإيه؟

أول حاجة نبدأ فيها إن إحنا نفسنا ندعو وإنك تتكلم وانشر بين الناس الدين كله، الإسلام والإيمان، سنتكلم في كل الإسلام، وأنت بتتكلم بقى كده بتتكلم في بتدعو كل الناس هتبتدي تكتشف بعض الافراد المميزين، اللي هم قبلوا كلامك واستجابوا، تبتدي تشتغل أكثر عليهم، تركز عليهم، يعني دلوقتي عندنا المستوى الأول هو خطاب بخاطب أي حد بقبله، أي حد زي ما النبي ﷺ كان بيعمل كده، كان في الدعوة في الفترة دي أبو بكر وكده، مش هم اكيد كلموا ناس ورفضوا؟ صح، يبقى هم بيكلموا أي حد، أي حد بيقابلني بكلمه.

يبقى إيه في الأول؟

خطاب عام لنشر كل معاني دين الإسلام، والعقيدة، والإيمان، والعبادة، والإحسان، وأحوال القلوب، والرقائق والكلام ده، بتكلم في كل حاجة، وأنا بتكلم بقى في كل حاجة دي تيجي المرحلة الثانية، إن أنا ابتدي بالناس اللي استجابوا، وفي ناس كمان مميزة، حاسس بإن هم كويسين هبتدي أركز أكثر

على الناس دي، اللي هو إحنا هنسميه مرحلة الدعوة الفردية بقى، اللي هي اشتغل عليها النبي ﷺ في دار الأرقم، كل ما يجي حد كويس كده يلحقه بالدار لغاية ما بقى فيه أفراد مميزين، ده كله مع خطابي العام أنا شغال فيه، بكلم كل حد، كل حد بالنسبة لي زبون، بتكلم وخلاص يمكن ربنا يهدي ده، أنا كده كده شغال في الأولانية عادي، وأنا شغال في الأولانية في ناس بتستجيب، ومن الناس اللي بتستجيب في ناس مميزة بقى، ببتي اركز على المميز اللي أنا لسه عايز أسسهم، ابتدي أركز على المميزين دول، اللي هم الدعوة الفردية، وابتدي بقى أهتم بهم اهتمام خاص، المرحلة اللي بعد كده بقى ابتدي أعرف المميزين دول ببعض، زي دار الأرقم كده خداهم في مكان يتعرفوا على بعض؛ لأن في اعمال مش هتم بالفرد الواحد، في حاجات محتاجة إن إحنا:

{وَتَعَاوَنُوا عَلَى الْبِرِّ وَالتَّقْوَىٰ وَلَا تَعَاوَنُوا عَلَى الْإِثْمِ وَالْعُدْوَانِ...}

فببتي بقى مجموعة الأفراد دول يتجمعوا ويبتدوا يشتغلوا شغل أكثر، كل واحد يستثمر طاقته وده معه علم، وده معه أسلوب، فببتي نشغل شغل أكثر، نبتي نعمل عمل في تعاون ونسميه عمل جماعي، وبعد كده تبتي العملية تكبر تكبر تكبر لغاية ما ربنا يعني يبسر لهذه المجموعة إن ربنا ينصرها في يوم من الأيام..

اللي بعد كده مقدرش أقول لك بالظبط هيحصل ايه، بس طول ما أنت شغال بالفكرة دي بالظبط شغل عام وتطلع افراد مميزين وتخليهم يتعاونوا على البر والتقوى، لو أنت شغال كده في يوم ما هتلاقي نفسك وصلت، هي دي طريقة وصول الأنبياء فعلاً، خطاب عام بكلم كل الناس، بصطفي من الخطاب العام أفراد مميزين اللي هو الدعوة الفردية، وبعد كده الأفراد المميزين دول بخليهم يتعاونوا على البر والتقوى والعمل الجماعي، وبعد كده لو أنا العملية دي مستمرة دائماً تخيل بقى ممكن تطلع بشغل عامل إزاي!

بعد فترة تبتي فعلاً تأثر وتعمل التأثير بقى المرحلة الأخيرة اللي هي مرحلة

التأثير العام؛ لأن في منك كثير بقى خلاص، في منك كثير موجودين في كل حنة، موجودين في المصالح، وفي وفي بيتدي الناس دي بعد كده هم موجودين في كل حنة، بيتدي بعد كده الناس تختلط بهم وتتق فيهم، تصدقهم وتتأثر بهم وتصدرهم، نبتدي بقى عملية التمكين بأي شكل، أنا معرفش التمكين هيحصل إزاي، ممكن يحصل حاجة أسرع من كده، المرحلة دي واسعة شوية مقدرش احدها لك، بس أنا بقول لك هي الفكرة التدرج ماشي إزاي، طريقة الأنبياء ماشية إزاي، اللي هي التدرج من القاعدة وأنت طالع، كده مش هتعرف تملك إلا لما تملك القلوب تحت والفكرة تكون مسيطرة تحت فعلاً، عشان كده مصعب بن عمير هو اللي حضر المدينة لمقدم النبي ﷺ، والمدينة كده راحة على طول ده مصعب قعد سنة فيها يدعو إلى الله قبل ما يوصل النبي يلاقي الدنيا خلاص جاهزة ومستعدة، رغم ذلك وجد مشكلة مع النفاق، لكن كان لازم تمهيد طويل عشان يحصل كده، فده برودو بيدينا فكرة كويسة جداً.

طيب بعد كده حصل إيه؟

الدعوة بدأت تنتشر بسرعة بقى، هو بسرعة بس العدد مش كبير، المرحلة اللي هي في الأول دي العدد فيها مكنش كبير، البعض بيتكلم في كان الأول سبعين بعد كده ربعمية وتلاتين، بس هقول لك بعض الأسماء كده اللي ترن في ودنك عشان تعرف إن الاسماء دي من أوائل من اسلم، زي أبو عبيدة بن الجراح، أبو سلمة، المخزومي، ام سلمة اللي هي بعد كده اتجوزت النبي ﷺ بعد موت أبو سلمة، الأرقم بن أبي الأرقم البطل اللي يجمع الدعوة، عثمان ابن مظعون، وقدامة ابن مظعون، وعبد الله ابن مظعون، سعيد ابن زيد أحد العشرة أو العاشر في العشرة المبشرين بالجنة، وزوجته فاطمة بنت الخطاب، يعني سعيد بن زيد من العشرة المبشرين كان متجوز أخت عمر ابن الخطاب، هي أسلمت طبعاً في الأوائل، وهي كانت من يعني قصة سواء صائغة ضعيفة هنشوفها ساعتها

بس أحد أسباب التأثير على عمر -رضي الله عنه وارضاه- وبعد كده عمر طبعًا بعد ما أسلم عدى كل الناس أصلًا وبقي المركز الثاني، ليس العبرة بمن سبق ولكن العبرة بمن صدق، خباب بن الأرت، جعفر ابن ابي طالب، أسماء بنت عميس وكانت دي زوجة جعفر، وبعد كده اتجوزت ابو بكر الصديق، وبعد كده اتجوزت بعديه غيره، يعني أسماء لها قصة طويلة، وعمر بن سعيد، حاطب بن الحارث..

بعض الأسماء ممكن متكونش مشهورة أوي، لكن من السابقين بردو عبدالله بن مسعود، عبدالله بن جحش، بلال بن رباح، صهيب بن عمار بن ياسر، وياسر وسمية وعامر بن فهيرة، ومن النساء أم ايمن اللي هي حاضنة النبي ﷺ، اللي هي كانت شغالة مع أم النبي ﷺ، فلما ماتت أمه في الابداء هي اللي حضنت النبي ﷺ ورجعته مكة؛ فاتسميت حاضنة النبي ﷺ، دي أول حد اهتم به بعد موت الأم قبل ما يتسلم لجدده، اه ام الفضل لبابة الكبرى بنت الحارث دي مرات العباس، والفضل إسلام البدري قوي العباس طبعًا اتأخر شوية على بدري كده، لكن أم الفضل أسماء مبكرًا، وأسماء بنت ابي بكر الصديق، هتلاحظ إن اللي اسلموا غالبًا إما المقربين أو الفقراء، يعني هتلاقي المسألة كلها إما الثقة أو الفقراء، وده يدلك هو زبونك الأولاني هيبقى من فعادة يعني، اه عادة زبونك الأولاني أول حد هيلتزم معاك اللي بيتق فيك ده المفروض تشتغل عليه بيتق فيك، واحد مش محتاج مبيكدبكش أو الناس اللي هما عادة الدنيا مش واخداهم أوي البسطاء خلي بالك ده زبون مهم جدًا ده أسرع بيلتزم، الحقيقة إحنا دايمًا طموحنا للسادة ولل كلام والناس هم دول طبعًا لما بيلتزموا الدنيا تفرق الصراحة بتفرق، لكن النسبة التأثير تحت تبقى أعلى بكثير جدًا يعني، لازم يكون لك تأثير على المستويات اللي هي مش شغلها دول، بيلتزموا بسرعة جدًا، فالمهم يعني دول التزموا بسرعة.

طيب بعد كده حصل إيه؟

حصل إن أول ما فرض بعد كده نزلت سورة المزمل يعني كل ده طبعا دار الأرقم بعد كده تحتوي الناس دي، هي أصلاً قصة حصلت ازاي؟ خليني اقول لكم الصلاة الأول، عشان دي هتفرق معي في اللي جاي، أول شيء فرض على المسلمين في الوضوء والصلاة بعد التوحيد تقول لي الصلاة.

مش الصلاة دي فرضت رحلة المعراج؟

لا ما هو دي صلاة تانية استنى بس، نزل قوله تعالى في المزمل، بعدها المدثر دي من أوائل ما نزل بعد المدثر:

{يَا أَيُّهَا الْمُزَّمِّلُ (١) فُمِ اللَّيْلُ إِلَّا قَلِيلًا (٢) نِصْفَهُ أَوْ أَنْقُصْ مِنْهُ قَلِيلًا (٣) أَوْ زِدْ عَلَيْهِ وَرَتِّلِ الْقُرْآنَ تَرْتِيلًا (٤)}

إذا أول ما وصل الديك فرضت على النبي ﷺ وعلى الصحابة قيام الليل، فرضت قيام الليل على النبي ﷺ والصحابة، فقيام الليل عبارة عن ركعتين في ركعتين في ركعتين، يبقى ده أحد الصلوات اللي اتفرضت، طبعا الوضوء اتعلمه علم النبي ﷺ الوضوء وبعد كده اتفردت الصلاة دي، كان في حاجة تانية مفروضة علينا، اللي هي ذكرت في سورة طه وغيرها:

{وَسَبِّحْ بِحَمْدِ رَبِّكَ قَبْلَ طُلُوعِ الشَّمْسِ وَقَبْلَ غُرُوبِهَا وَمِنْ آنَاءِ اللَّيْلِ فَسَبِّحْ وَأَطْرَافَ النَّهَارِ لَعَلَّكَ تَرْضَى}

قالوا إن دي صلاتين اتفرضوا على المسلمين، كان كل واحدة فيهم ركعتين بس، واحدة قبل طلوع الشمس اللي هي في ميعاد صلاة الفجر، واحدة قبل غروب الشمس اللي هي ما بين العصر والمغرب، كان ركعتين وركعتين؛ إذا الصلاة اللي كانت مفروضة في الوقت ده ركعتين في وقت صلاة الفجر، وركعتين في وقت صلاة العصر، دول فرض، وقيام الليل، بعد سنة نزل آخر آية من سورة المزمل، اللي هي خففت عنهم الموضوع ده، واترفع عنهم الفرضية وبقي الموضوع مستحب، واختلف النبي ﷺ هل فضل فرض عليه قيام الليلة ولا لا؟

دي مسألة فيها خلاف بين أهل العلم، لكن أكيد الموضوع رفع عن الصحابة وانتقل من الوجوب إلى الإستحباب، بعد كده اللي هم الركعتين دول اتنفخوا بعد المعراج، لما نزلت الصلوات الخمس دي اتنسخت وبقى مكانها الصلوات الخمس، بس ده بيديني إشارة دلوقتي إلى منهج التربية بقی، يعني دلوقتي إحنا قلنا طريقة التغيير إزاي بغير الواقع بتاعي، أنا بغير بقی الواقع بتاعي مش أنا بقول دعوة فردية صح؟ بتدعوهم ليه؟ إيه أهم حاجة أركز عليها؟

إحنا عندنا دلوقتي لو لاحظت هنلاقي إن إحنا دلوقتي في ثلاث حاجات، خايفني هقول الظاهر الأرقم وبعد كده ارجع لها ثاني.

هو دلوقتي لما اتفرضت الصلاة دي حصل إيه؟

حصل أصحابك في الأول كانوا بيصلوا خارج البيوت، يعني مثلاً ممكن اتنين تلاتة يجمعوا بعض كده يروحوا مصليين في شعاب مكة كده مع نفسهم، كان في الأول كده، فحصل ان مرة اتشافوا وراء بعض الناس من قریش شافوا سعد بن ابي وقاص وشافوا مجموعة كده بيصلي فأنكروا عليهم، فحصل مشادة، اتخانقوا راح سعد بن ابي وقاص ضرب واحد جداً، ضربه كده كان معه حاجة شبه عضمة كده، راح ضربه بها فعلاً وصلت لخرقة وضربه بها وسال دم من وجه الرجل ده، فهو الموضوع كان هيكبر لذلك يقال إن سعد أول من أهرق دم في سبيل الله بسبب الحادثة دي، أول واحد أرق دم في سبيل الله سعد بن ابي وقاص عشان كانت الخنافة دي على الصلاة، قالوا لهم متصلوش هنا وبتاع هنصلي وبتاع راح ضربوا بعض، فسعد ضربوا واحد بعظمة كده راح فتح له دماغه، فطبعاً الموضوع اتلم يعني.

فالموضوع كان هيكبر وكانت هتبقى مشكلة كبيرة فالنبي ﷺ لما لقي كده قال لهم لا لا مش هينفع الموضوع كده، وده من الحكمة لما تلاقي الناس بيقول لك أنت بقی جبن الخذلان واحدة واحدة، في حاجة اسمها مفسدة كبيرة

منصليش خالص؟ ولا نصلي في البيت؟ خلاص صلوا في البيت، فأمرهم إن هم يصلوا في البيوت، وبعد كده بدأ يجمعهم في دار الأرقم بن أبي الأرقم، اللي هو الشاب اللي أسلم ده، ودي حاجة حكمة عالية أوي من النبي ﷺ، النبي ﷺ يا جماعة عبقرى، يعني حاجة خطيرة جدًا.

ليه اختار الأرقم بن أبي الأرقم؟

قال له كذا سبب:

- أولاً الأرقم من بني مخزوم، وفي بينهم وبين بني هاشم مشاكل، فحتى لو حد من بني مخزوم عرف إن الأرقم يأوي الإسلام مش هيروح يقول لحد من بني هاشم عشان ميحيش يأذي حد من بني مخزون، وممكن يكتم كمان السر عليه..

عشان محدش زي ما يقول كده يعلم على بني عبيد، يبقى أنتم بقى عاملين ومخبينين والكلام ده فهو متأمن إن بني مخزون مش هيتعاونوا مع بني هاشم عليهم، إن هم أصلاً في بينهم عداوة، فحتى لو الأرقم قرايبه عرفوا ما هو قرايبه هيعرفوا مش هيقول، هو هيستروا عليه وخلاص، وعصبية وهتعدي، دي عيب.

- الحاجة الثانية إن الأرقم مثلاً عنده سبعتاشر سنة، مين يتخيل النبي ﷺ هيروح يقعد مع واحد عنده سبعتاشر سنة، أبعد ما يكون هيدوروا في بيت ابو بكر، في بيت عثمان، في بيت عبدالرحمن بن عوف، الناس الثقيلة دي.

- الحاجة الثالثة إن دار الأرقم كانت متطرفة شوية مكنتش في وسط البلد يعني، كانت عند الصفا كده فمتطرفة شوية مفيش حد يبجي في باله يعني المهم الموضوع جامد أوي.

طيب يبقى إحنا كده لو ركزنا هنلاقي إن في تلت محاور النبي ﷺ شغال عليها، واحد قرآن، اتنين الصلاة، ثلاثة الصحبة، حلل الموقف عشان أقول لك دلوقتي أنت دلوقتي في واحد ملتزم جديد وأنت ملتزم به، إيه أهم ثلاث

حاجات تبدأ بهم؟

أنت يا عم لقيت الدين كله واسع أوي، أنت مش عارف تلمها منين ولا منين، هصلي ولا أصوم ولا ولا أبطل أغاني ولا أبطل إباحية... أنا مش عارف، مش هعرف ألم الدين كله، أنا لسه ملتزم أول امبارح، أو واحد ملتزم جديد معك، وأنت مش عارف تقول له إيه ولا إيه.. ما هو الدنيا بايضة معه، وعنده حاجات كثير غلط، وفيها واجبات كثير مقصر فيها، مش هينفع أقول له كله، لازم ابدأ معه.

طب ابدأ بإيه؟

أول ما يبدأ يروح قايل له السلسلة دي متنفعش، ما هو ده اللي لقاه في وشه، قال الحظاظه يا عم واحدة يا باشا، ما هو ديان مبيصلش، فيعني ممكن تبدأ بداية غلط، فأنت شايف دلوقتي تقييمك اللي قدامك ده في واحد بيخش سخن، ممكن لو قلت له كله هيعمله دلوقتي، مش مشكلة، بس أنا شايف شاب يعني بسم الله وعازي استفتح معه وعازي أجيب رجله واحدة واحدة، وحاجة فعلاً تجيب نتيجة، فأنا عندي اختيارات محدودة، مش هينفع أقول له اكرر من كده، هقول له هي ثلاث حاجات تركز عليها، زي بالزبط نفس الفكرة أنا اتخطبتها بالسير أهو، أول حاجة تحسه على الصلاة، إن هو يصلي، لو كان رجل يصلي في المسجد، وتحاول تهتم بصلاته وتعلمه الصلاة كويس وتحبه فيها، وتخليه يعرف يعني إيه خشوع في الصلاة، وياريت لو يقوم الليل بقي.

تاني حاجة تسحبه في سكة القرآن، مجلس قراءة.. تجويد.. تحفيظ.. أي حاجة، إحنا مش عازين نعمل حاجة معينة، أنا مش جايبه يحفظ دلوقتي، هو أنا هشوف هو هيجي معه، وهجيبه خلاص عازي تحفظ ماشي، عازي اصح لك تلاوة ماشي، عازي نقعد كده نقرأ في القرآن وأفسر لك ماشي، المهم اجيبه أي حاجة في سكة القرآن، مش تحفيظ بقي، مش تيجي مثلاً نقعد

يلا تجويد وتمسكه في القلقة تسلخه.. يا عم ده أول امبارح حرام عليكم بقى في البسملة أسبوع وفي الفاتحة شهر، ده يعني كتر خيريه أني قاعد معك، هي واحدة واحدة لسه جاي أول امبارح، إحنا أصلاً مفيش أي هدف دلوقتي لا تجويد ولا حفظ ولا أي حاجة، أنا بجيبه سكة يا جماعة، افهم بقى أنت بتعمل إيه، أنت دلوقتي بتستدرجه عشان يحب القرآن ويتأثر به، كده هو هيسلم لك نفسه هيستحمل كل ده، هاجي دلوقتي أي حاجة في القرآن جت معها جيم، حفظ بقى تفسير تجويد قراءة أقرّءه نقعد مع بعض نحكي بقى خواطر أي حاجة، المهم إن أنا رابطته بمجلس في قرآن وخلص، وطبعاً مجيش فيه قرآن يكون بيدير المجلس ده مربى وفاهم هو بيتعامل مع مين عشان ميضربش ضربة ينفره منه أو يخرجه أو يتهمه بالجهل، هو فاهم ده بيعمل إيه هنا؟ ده مش جاي تجويد ولا جاي تحفيظ؟ إحنا بنضحك عليه بس، فسايسه هو الله يكرمك، إحنا عايزين نحبيه في دين ربنا وخلص، فلو المربي مش فاهم هيبوظ لك ده أو السلسلة اللي انت عاملها دي كلها، فأنت عندك دلوقتي أنا حبيبته في الصلاة، حبيبته في القرآن، وبعد كده بحاول أحوِّط عليه بصحبه كويسة فاهمة هي بتعمل إيه، مش أول ما هيشوفوه إيه الوشم ده يا ابن الاسلام أنا مش هاجي مسجد ثاني، إيه ده تسريحة البنات دي؟ يا سلام!

واحدة واحدة يا جماعة لو عامل شعر وضايفر ملكش دعوة، لو يعني ده واحد لسه متعلقش على التاتو ومتعلقش دلوقتي على السلسلة، هو هيكون اللي هيبطله الواحد واحدة واحدة، إلا لو أنا قلت لكم هيستحمل كده اتكوا عليه، هو كده كده يجيب بس هو في العادة بيبقى صعب شوية، فواحدة واحدة يقعد يدخل يقول لك أنا عايز أصلي بس كل الناس تشوف التاتو بيقدوا يقطعوا، أنا اتخنقت، طب وبعدين؟ هنعوط عليه بصحبة طيبة، تعامل معك كويس بقى واكل وشرب ورحلات وفسح وكده، وسيبه بقى، متكلمش كتير دلوقتي، انا معتمد على حاجتين أساسيتين، أو خاينا ثلاثة بردو نفس الكلام، واحد قوله تعالى إن الصلاة تنهى عن الفحشاء،

أنت جبت معك داعية قوي جدًا، داعية معنوي أنت مش هتشوف مش هتعرف اثره إلا بعد شوية، عشان كده أنا مهتم أني أصلي كويس، صلاة بجد.

تاني حاجة {إِنَّ هَذَا الْقُرْآنَ يَهْدِي...} داعية كمان المشي معك، إن هذا القرآن يهدي هي أقوى، فده شغال معي بردو، زق معي ما انا معي اتنين دعاة شغالين معي على طول، والصحبة الأخيرة {وَأَصْبِرْ نَفْسَكَ مَعَ الَّذِينَ يَدْعُونَ رَبَّهُمْ...} دي كده كده بتزق، والصاحب صاحب، يبقى أنا معي ثلاث دعاة شغالين أهو، أنا عايزك تعمل كده مع أي حد، ودي مُجربة يعني كتير جدًا مع نفسك ومع غيرك، يعني حتى انت بدأت كده، تلاقي الشاب ده هو لوحده هيجي يقول لك شيخ هو الموسيقى حرام؟

هتقول له آه، وسيبه، اسبوعين ثلاثة يقول لك أنا بطلت اسمع به، من غير ما تكلمه أصلًا، أنا قفلت من السجائر مش عارف ليه، بس مش جاي معايا سكة خالص، إيه فين السلسلة؟ يقول لك لا قلعتها خلاص منظرها وحش يعني، لاحظت إن هو وسط الأخوة كده شكله غريب، هو كان شكله عادي وسط الشباب، يعني أنت حظيته وسط الأخوة، فشكله غريب، خلاص طب ما أنا أقلعه يعني هو أنا يبقى شكلي غريب يعني، شوية يقول لك البنات قطعت أعياد، شوية يقول لك شيخنا انا عايز عايز أحفظ قرآن بقي، أنا سخنت وعايز أحفظ قرآن..

شيخنا أنا عايز أشد حيلي شوية في الصيام، أصوم إزاي؟ هو قعد بقي هو لوحده بيحب معك، هو ده بقي اللي أنت عملته، أنت ادبته الدوافع، واستنى منه هو لوحده بيحي هيجي يقول لك، ولو اتأخر عليك أنت كده وبردو سهلة شوية مش هتسيبه على البحري ولا تتك، يعني لا تتك تكة تنفره، ولا تسيبه خالص لغاية ما يجي لوحده خالص، بس هو غالبًا هتلاقه في حاجات بيحي لوحده فيها، وفيه حاجات أنت هتضطر مش تتك بقي، بس أنت لك نظر، هو يستحمل دلوقتي طب ما يلا بقي فرحنا بقي وسيبه، وسيبه وأدي له مهلة

بردو هيخلص، فهي دي الطريقة ده اللي أنا شايفه، أنا بجيب لك من السيرة أهو، هو الصحابة كان معهم إيه غير صلاة وقرآن وصحبة؟! مفيش حاجة رابعة، يمكن أنا نسيناها مهمة جدًا بس متضمنة في اللي أنا قلته، قدوة ﷺ، طبعًا دي حاجة مش هتكرر، بس على الأقل نحاول يبقى هو الشيخ نفسه قدوة، واللي هيدمر كل حاجة لو جه بعد كده الأخ ده إلترم مع الشيخ وبتاع واتغر فيه في الأول وقرب منه اكتشف إن هو نصاب، أو مش كويس، أو بيشتم، أو.. أو.. ده يرجعنا لنقطة الأخلاق تاني، للأسف بقي في دلوقتي جيل كامل من المنتسبين للتيار الإسلامي الشتيمة عندهم بقت سهلة أوي، بسبب طبعًا المشاكل والخلافات والسياسة والكلام ده بقوا يستسهلوا الشتيمة بقي عادي خلاص، يقولك أنا بنتقد الواقع، أو ده هما كده يستاهلوا، فبقت شتيمة قدرة، متخيل إحنا وصلنا لإيه! وللأسف بدأها بعض الدعاة للأسف وقال لك إيه يا شيخ هو بيقول كده فإحنا بنقلده، ويبسمعوا فيديوهات وبيقلدوه، الشتيمة قدرة قدرة اللي هو لو سمعتها في الشارع تشمئز، لو سمعتها من صايغ تشمئز، بقي ده بيقولها ناس ملتزمين، أخوات منتقبات بيقولوا الشتايم دي، وبيكتبوها على النت وبيعملوها في الكومنتات، ما هذا؟ من إمتي؟

هات لي في السيرة كده حاجة شبه كده، إحنا وصلنا للمستوى ده، حديث النبي ﷺ (ليس المؤمن بالطعان ولا اللعان ولا الفاحش البذي).

ولا أنا ممكن أقول لك كلام شديد، بس مش هقول كلام قدر، انا أقول كلام شديد النبي ﷺ قال لقد جئكم بالذبح، سيدنا موسى قال إيه؟

{وَقَالَ مُوسَىٰ رَبَّنَا إِنَّكَ ءَاتَيْتَ فِرْعَوْنَ وَمَلَأَهُ زِينَةً وَأَمْوَالًا فِي الْحَيَاةِ الدُّنْيَا رَبَّنَا لِيُضِلُّوا عَنْ سَبِيلِكَ رَبَّنَا اطْمِسْ عَلَىٰ أَمْوَالِهِمْ وَاشْدُدْ عَلَىٰ قُلُوبِهِمْ فَلَا يُؤْمِنُوا حَتَّىٰ يَرَوْا الْعَذَابَ الْأَلِيمَ}

كلام شديد أهو، بس مش كلام وقح، مش كلام بذيء، فلازم إن إحنا نحافظ على مستواه، في مستوى معين من الأخلاق متنزّلش عنه مهما اتعصبت، مهما كان أنت لك مستوى مش هينفع تنزل عنه، اللي عايز أقوله يعني إن

هنا القدوة ﷺ، القدوة ده مش هينفع يعمل كده خالص، يعني تخيل أنت واحد دخل إل التزام جديد لقي الشتايم دي، فقعدنا نبرر له أصل إحنا بنشتم الواقع، يقول لك إيه ده؟!!

الشيخ دول طب ما أنا اصحابي كانوا كده، طب إيه الجديد يعني؟ طب أرجع لهم هما أحسن، اللي تعرفه أحسن من اللي متعرفوش، طب ما أنت صورة مشوهة أهو، فمهما كان يا جماعة فيه مستوى معين من الكلام آه بنقول كلام شديد وشديد أوي، بس في درجة مينفعش أنزل عنها، اخلاقي متسمحش إن أنا أعمل كده، المهم إن هما أربع حاجات: قرآن، صلاة، صحبة، قدوة، المعلم ده لازم يكون هو نفسه يكون قدوة، يبقى إحنا كده فهمنا التتابع ده.

نقول المقدمة سريعة وهنكملها المرة الجاية إن شاء الله، النبي ﷺ بدأ خلاص بقى معه دار الأرقم، بقى معه مجموعة ما شاء الله اللهم بارك بدأت تكبر تكبر تكبر، بقى فاهم كل الاسماء دي، وفي أسماء كتير يعني قيد سبعين كان في قيد كان بيقد فيها مية، أو أكثر من مية الله اعلم، السعادة كانت كبيرة طبعًا، دول صفوة الصفوة.

مَنْ هُمْ؟

السابقين إلى الإسلام، في مستويين من السابقين في الإسلام، مستوى الواسع اللي هم اسلموا قبل الحديبية، { لَا يَسْتَوِي مِنْكُمْ مَنْ أَنْفَقَ مِنْ قَبْلِ الْفَتْحِ وَقَتْلَ أَوْلِيَّكَ أَعْظَمُ دَرَجَةً مِّنَ الَّذِينَ أَنْفَقُوا مِنْ بَعْدِ وَقَاتِلُوا ۚ وَكُلًّا وَعَدَ اللَّهُ الْحُسْنَىٰ وَاللَّهُ بِمَا تَعْمَلُونَ خَبِيرٌ }.

كل مَنْ أسلم قبل الحديبية أحسن من اللي أسلم بعد الحديبية، في مستوى بقى داخلي، داخل دي اللي هم بتوع التلات سنين دول اللي في الأول، دول بقى صفوة الصف، في يقول لك بقى صف ولا هم قبل إسلام عمر وحمزة بيعتبروا دول صفوة بردو؛ لأن إسلام عمر وحمزة خلى الناس اجراً شوية لما اللي قلقان أظهر إسلامه، فاللي بعد ما أظهر إسلامه قبل كمان عمر

وحمزة لا ده جامد جدًا، هنشوف بعد كده بقى المرة القادمة بإذن الله -تعالى- إن النبي ﷺ هيتقال له {وَأَنْذِرْ عَشِيرَتَكَ الْأَقْرَبِينَ}، فيبتدي يجمع أعمامه ويدخل يكلمهم، لأول مرة هيجمع أعمامه، ابو لهب على طول هيلقطه، فيروح هو اللي بادئ ويدي كلام جامد، النبي ﷺ هيلقي الموقف مش هينفع أكمل دلوقتي، فبحكمة شديدة يروح لامم من المجلس ومنسحب وماشي، خلاص هو ابو لهب دخل بوظ الدنيا، خلاص مش هينفع يتكلم، هو خد الميكروفون الأول وهيجهم عليا.

فالحكمة إن أنا خلاص مرة تانية، شوية وراح جمع أعمامه تاني، راح على طول اتكلم على السداسي، تك تك تك تك خلص الكلام اللي معه، وابو طالب راح دخل أيده، فابو لهب مكنش عارف يعمل إيه ساعتها، قال كلام بس محدش سامعه، وحصل لديه، وبعد كده أول ما أبو طالب أيد النبي ﷺ على طول خد قرار ونزل عليه ﷺ:

{فَأَصْدَعْ بِمَا تُؤْمَرُ وَأَعْرِضْ عَنِ الْمُشْرِكِينَ}

هو راح طالع على جبل الصفا، خد الدعم بقى خلاص من ابو طالب بلسانه قدام الناس، راح طلع على جبل الصفا وبدأت الدعوة الجاهلية، وخلص التلات سنين وهتبدأ بقى مرحلة خطيرة جدًا، مرحلة الدعوة والجهر، دعوا ملامح الموضوع ده والصد عن سبيل الله، وطرق الصد عن سبيل الله، زي النبي ﷺ هيواجه المواقف دي، لا يبقى كلام كبير أوي المرة الجاية بإذن الله.

جزاكم الله خيرًا، سبحانك اللهم ربنا وبحمدك، نشهد أن لا إله إلا أنت، نستغفرك ونتوب إليك.

دثرونا بدعائكم الطيب.